



2020-5

22. oktober 2020

All. nr./notatnr.:

2020-909-0002-13

Sull./sagsbeh.: BKT/jh

**Meeqqat angerlarsimaffimmik avataanut inissinneqarsimasut
angerlartinneqarnissaannik aalajangiinerni pingasuni kukku-
nerit arlallit**

*Avannaata Kommuniata sulianik meeqqat angerlarsimaffimmik avataanut inissinneqarsimasut angerlartinneqarnerinut tunngasunik suliarinnittarne-
ranik misissuineq Ombudsmandip 2019-imi aallartippaa.*

*Misissuineq taanna Ombudsmandip Ombudsmandi pillugu inatsimmi § 15,
imm. 2 tunngavigalugu aallartippaa, tassuunalu aalajangersarneqarpoq
Ombudsmandi oqartussaasup sulianik suliarinninnera pillugu ataatsimut
misissuiffiginninnernik ingerlatsisinnaasoq.*

*Misissuineq taanna Ombudsmandip oqaaseqaataanut 2019-2-mut ilaatigut
malitseqartitsiffiginninneruvoq, oqaaseqaallu taanna suliamut angerlartit-
sinnermut tunngasuuvoq, tassanilu taamani Qaasuitsup Kommuniusup ta-
matumalu kingornatigut Avannaata Kommuniata meeraq angerlartinne-
qarsinnaanersoq isummerniarnerminnut piffissaq ukiut tallimat sinnerlugit
sivisussuseqartoq atorsimavaat. 2019-2 www.ombudsmandi.gl-imi nas-
saarineqarsinnaavoq.*

*Ombudsmandi Avannaata Kommuniata sumiiffimmi ingerlatsiviani ataatsi-
miinnerit tunngavigalugit aalajangerpoq angerlartitsinerit pillugit aalaja-
ngiinerit pingasut misissuiffiginiarlugit.*

Aalajangiinermi ataatsimi meeqqap 15-inik ukiullip inissinneqarsimanera aalajangiusimaneqassasoq kommuni akuersisitsilluni inissiisarneq pillugu malittarisassat tunngavigalugit aalajangiivoq, naak meeqqap angerlartinneqarnissani kissaatigigini oqaatigigaluaraa.

Ombudsmandip oqaatigaa kommuni meeqqap 15-inik ukiullip inissineqarsimanera akuersisitsilluni inissiisarneq pillugu malittarisassat tunngavigalugit aalajangiusimaneqassasoq aalajangiiguni aamma meeqqap nammineq tamatumunnga akuersinera, imaangitsoq angajoqqaatut oqartussaassutsimik tigummiaqartup kisimi akuersinera, pissarsiariniartussaagaa.

Taamaattumik Ombudsmandi isumaqarpoq inissiineq taamaallaat akuersisitsinani inissiisarneq pillugu malittarisassat tunngavigalugit aalajangiusimaneqarsinnaasoq, oqaatigalugulu malittarisassat kukkusut pillugit aalajangiusimanninneq kukkunerusoq ilungersunartoq isorisarialillu.

Ombudsmandi aammattaaq isumaqarpoq kommuni suliani pingasuni taakkunani tamani nalunaaruteqarnermini tunngavilersuinerminilu kukkussuteqarsimasoq.

Ombudsmandili oqarpoq kommunip sulianik pingasunik taakkuninnga suliarinneqqilernissaa pissutissaqanngitsoq, meeqqammi kingusinnerusukut angerlartinneqarsimammata.

Ombudsmandip paasinninnera unaavoq kukkunerit immikkuullarissut a-taasiakkaaginnaat pineqanngitsut, kukkunerilli ilaat sulianik periaaseq kommunip suliani angerlartitsinernut tunngasuni nalinginnaasumik malit-tagaa tunngavigalugu suliarinnissimaneq pissutigalugu pilersimasut.

Taamaattumik Ombudsmandip Avannaata Kommunια kaammattorpaa kommunip suleriaasii kommunip sulianik angerlartitsinermut tunngasunik suliarinninnerani makku pisariaqarneratut annertutigisumik isummerfigineqartartussanngorlugit aaqqissuunneqarsimanersut misissoqullugu:

a) *angerlartitsiumalluni qinnutigisap inissiinerup taamaallaat akuersisitsinani inissiisarneq pillugu malittarisassat tunngavigalugit attatiinnarneqarnissaanik isumaqarnersoq,*

b) *angerlartitsisoqarnissaanik aalajangiineq angerlartitsisoqarnissaaniluunniit qinnutigisap itigartinneqarnissaanik aalajangiineq meeqqamut inissinneqarsimasumut aamma meeqqap angajoqqaavinut allakkatigut nalunaarutigineqassanersoq aamma*

c) *angerlartitsisoqarnissaanik aalajangiineq angerlartitsisoqarnissaaniluunniit qinnutigisap itigartinneqarnissaanik aalajangiineq tunngavilersuummik naammagittaalliornissamullu periarfissaq pillugu ilitersuummik imaqassanersoq.*

(Oqaaseqaat 22. oktober 2020-meersoq, j.nr. 2020-909-0002)

Suliami pineqartut kikkuussusiinik ilisarnarunnaarsaanermi taaguutit uku atornerqarput:

B1: Meeraq 1

B2: Meeraq 2

B3: Meeraq 3

B4: Meeraq 4

B5: Meeraq 5

M: Meeqqap 5-ip anaanaa

X: Meeqqamut 2-mut, 3-mut 4-mullu angajoqqaq

Y: Meeqqamut 2-mut, 3-mut 4-mullu angajoqqaq

Illoqarfik A: Illoqarfik

Illoqarfik B: Illoqarfik

Tamatuma kingornatigut imaattunik oqaaseqaateqarpunga:

1. Misissuininnut tunngaviusoq

1.1. Misissuineq manna nammineerlunga suliniuteqarnikkut aallartippara. Inatsisartut Ombudsmandiat pillugu Inatsisartut inatsisaanni nr. 7-imi, 1. juni 2017-imeersumi (matuma kingornatigut Ombudsmandi pillugu inatsimmik taaneqartartussami) § 15, imm. 1 aamma 2 innersuussutigaaq. Taakku-nuuna aalajangersarneqarpoq Ombudsmandi suliamik nammineerluni misissuiffiginnilersinnaasoq, Ombudsmandilu oqartussaasup sulianik suliarinnin-nera pillugu ataatsimut misissuiffiginnissinnaasoq.

1.2. Misissuineq manna oqaaseqaatinnut 2019-2-mut nittartakkanni www.ombudsmandi.gl-imi atuarneqarsinnaasumut ilaatigut malitseqartitsissutaa-voq. Oqaaseqaat taanna angerlartitsinermik suliamut tunngasuuvoq, tassa-nilu taamani Qaasuitsup Kommuniusup kingusinnerusukkullu Avannaata Kommuniata meeraq angajoqqaatut oqartussaassusermik tigummiqartoq a-kuersitillugu angerlarsimaffimmi avataanut inissinneqarsimasoq, angajoq-qaatut oqartussaassutsimik tigummiqartup tamanna kissaatigalugu oqaati-gimmagu, angerlartinneqarsinnaanersoq isummerniarnerminnut ukiut talli-mat atorsimavaat. Oqaaseqaammi tassani ilaatigut makku oqaatigaakka:

“Ataatsimut isiginnillunga paasinninnera unaavoq piffissaq suliamik suliarinnin-nermut atorneqartoq pissutissaqanngilluinnartumik sivisuallaartoq isorisariaqar-luinnartorlu pineqartoq. Taamaattumik Avannaata Kommuniata piffissap suliamik suliarinninnermut atorneqartup iluarinanginneranik oqarnera isumaqatigisoru-jussuara.

Tunngaviutittariaqarpara piffissaq suliamik suliarinninnermut atorneqartoq sulia-mik suliarinninnermi kukkunerit ilungersunartut arlallit nassatarisaannik ilaatigut pisariaqanngitsumik sivitsorsarneqarsimasoq, kommunillu suliamik suliarinninne-rat piffissap suliamik suliarinninnermut atorneqartup suliani angajoqqaat meeq-qallu akornanni pissutsinut tunngasuni qanoq aalajangiisuutigisumik pingaarute-qarneranik paasinninnginnermit sunnerneqarsimasoq.

Tamatuma Avannaata Kommuniata sulianik angerlartitsiniarnermut tunngasunik suliarinnittarnera eqqarsaatigalugu ataatsimut ernumassuteqarnissannut pissu-tissaqalersippaanga. Taamaattumik suliassaqarfik taanna siunissami malinnaaffi-giniarpara.”

2. Misissuinerma ingerlasimanera

2.1. Avannaata Kommunia 26. november 2019-imi allaffigaara kommunip sulianik angerlartitsinernut tunngasunik suliarinnittarnera misissuiffigilerniarlugu aalajangertunga.

Avannaata Kommuniata illoqarfimmi B-mi ingerlatsivia allakkatigut 20. december 2019-imeersutigut qinnuigaara suliat angerlartitsinermut tunngasut ingerlatsiviup 2019-imi suliarisimasaasa tamarmik allattorsimaffiat uannut nassiateqqullugu. Kommuni aamma qinnuigaara suliani taakkunani allagaatit uannut nassiateqqullugit.

Avannaata Kommunianut allakkanni ilaatigut oqaatigaara qinnutigisanni suliat angajoqqaatut oqartussaassutsimik tigummiaqartup meeqqamik angerlarsimaffimmi avataanut inissinneqarsimasumik angerlartitsiumalluni qinnuteqarfigisimasai tamarmik pineqartunut ilaatinneqartut, meeqqap akuersisitsilluni akuersisitsinaniluunniit inissinneqarsimanera apeqquataatinnagu.

Aamma allappunga qinnutigisanni suliat angerlartitsinernut tunngasut Avannaata Kommuniata 2019-imi suliarisimasai tamarmik pineqartunut ilaatinneqartut – meeqqap angerlarsimaffimmi avataanut qanga inissinneqarsimanera aamma angajoqqaatut oqartussaassutsimik tigummiaqartup meeqqamik angerlartitsiumalluni qanga qinnuteqarsimanera apeqquataatinnagit.

Suliat angerlartitsinernut tunngasut illoqarfimmi B-mi ingerlatsiviup 2019-imi suliarisimasaasa arlallit ilaanni allagaatit aalajangersimasut Avannaata Kommuniata uannut 4. aamma 14. februar 2019-imi nassiuppai.

Sulisuma ilaat marluk suliat angerlartitsinernut tunngasut taakku ulluni 14., 17. aamma 18. februar 2020-mi Avannaata Kommuniani ingerlatsivimmi illoqarfimmi B-miittumi ataatsimiissutigineqarnerini arlalinni peqataapput. Suliat angerlartitsinernut tunngasut arlallit sulisuma kommunimut oqaloqatigin-

nissutigaa, mappit suliani allagaatinik imallit arlallit misissorlugit suliamilu allagaatit toqqakkat misissuininni atugassat assilillugit.

Oqaaseqaatigigallagara Avannaata Kommunianut 3. juni 2020-mi nassiuppara, tasanilu kommuni aamma qinnuigaara oqaaseqaatigigallagara pillugu oqaaseqaateqaqqullugu.

Kommunip oqaaseqaatigigallagara pillugu oqaaseqaataa 21. august 2020-mi tiguara, tassanngalu ilaatigut erserpoq allakkatigut aalajangiineq B5-ip anaanaanut M-imut kommunip 9. maj 2019-imi nassiussimagaa.

Kommuni 24. august 2020-mi qinnuigaara allakkatigut aalajangiineq 9. maj 2019-imeersoq assilineru kommuni uannut siusinnerusukkat nassiussimanngisaa uannut nassiuteqqullugu.

Kommunip allakkat M-imut ingerlatitaasut 29. juli 2019-imilu ullulerneqarsimasut (oqaaseqaatip kingornatigut ilanngussani issuarneqartut) ulloq taana uannut nassiuppai. Allakkat taakku B5-ip angerlartinneqarnissaanik kommunip aalajangiineranut uppersaaitut iluseqarput.

Kommuni 25. august 2020-mi attaveqarfigaara aperalugulu allakkat nassiunneqartut taakku tasaanersut kommunip allagaani 21. august 2020-meersuni eqqaaneqartut M-imullu 9. maj 2019-imi nassiunneqarsimasut. Kommunip uppersarlugu oqaatigaa allakkat nassiunneqartut taakku tassaasut aalajangiineq kommunip allagaani 21. august 2020-meersuni eqqaaneqartoq pillugu allakkat.

Taamaattumik aalajangiineq M-imut 9. maj 2019-imi nassiussimanerarlugu kommunip oqarnera kukkunerusoq ilimagaara, M-imummi allakkanit erseremat taakku 29. juli 2020-mi nassiunneqarsimasut.

3. Suut misissorpakka?

3.1. Sulisukka marluk kommunip ingerlatsiviani illoqarfimmi B-mi ataatsimiinnerni paasitineqarput suliat angerlartitsinermut tunngasut qulit illoqarfimmi B-mi ingerlatsiviup 2019-imi suliarisimagai. Sulianit taakkunannga angerlartitsisoqarnissaanik angerlartitsisoqannginnissaanilluunniit aalajangiinerit pingasut sukumiinerusumik misissugassanngorlugit immikkoortippakka. Aalajangiinerit taakku tulleriinneri malillugit 2017-imi, 2018-imi aamma 2019-imi pisimapput, paasivarali meeqqat aalajangiinerni pineqartut aatsaat 2019-imi tamakkerlutik angerlartinneqarsimasut.

Aalajangiinerit uku pineqarput:

Aalajangiineq 1	B1-ip (inuusoq [...] 2002-mi), B2-p (inuusoq [...] 2003-mi), B3-p (inuusoq [...] 2005-imi) aamma B4-p (inuusoq [...] 2007-imi) angerlartinneqarnissaasa itigartitsissutigineqarnissaanik allakkatigut 25. oktober 2017-imeersutigut aalajangiineq. Aalajangiineq taamani Qaasuitsup Kommuniusumi pisimavoq.
Aalajangiineq 2	B5-ip (inuusoq [...] 2014-imi) angerlartinneqarnissaanik oqaasiinnartigut aalajangiineq 29. november 2018-imeersoq. Taassuma saniatigut B5-ip angerlartinneqarnissaanik kommunip akuersissutiginninneranut allakkatigut uppernarsaat 29. juli 2020-meersoq.
Aalajangiineq 3	B2-p (inuusoq [...] 2003-mi), B3-p (inuusoq [...] 2005-imi) aamma B4-p (inuusoq 19. [...] 2007-imi) angerlartinneqarnissaannik allakkatigut 15. november 2019-imeersutigut aalajangiineq.

Kommunip ingerlartitsinissamik akuersissutiginninneranut allakkatigut uppernarsaat allakkatigut aalajangiinerit marluk kiisalu angerlartitsinissamik qinnutigisaq taamani Qaasuitsup Kommuniusup aalajangiineranik 1-imik kinguneqartoq ilanngussami oqaaseqaatinnut tulliusumi issuarneqarput.

3.2. Aalajangiinernik qulaani taaneqartunik misissuininni makku isiginarniarlugit aalajangerpunga:

- aalajangiinerit aalajangersakkanik eqqortunik tunngaveqarluni pisimanersut (immikkoortoq 4)
- aalajangiinerit kimut nalunaarutigineqarsimanersut kiisalu aalajangiinerit qanoq iliorluni qangalu nalunaarutigineqarsimanersut (immikkoortoq 5) aamma
- aalajangiinerit tunngavilersuummik naammattumik naammagittaalliornisamullu periarfissaq pillugu ilitersuummik imaqarnersut (immikkoortoq 6).

3.3. Apeqqutit allat misissunngilakka. Soorlu taamani Qaasuitsup Kommuni-usup imaluunniit Avannaata Kommuniata meeqqat inissinneqarsimasut angajoqqaaminnut angerlartinneqarsinnaanersut naliliinerat isumaqatigineriga isummerfiginngilara. Taamatut naliliisoqassappat perorsaaneq isumaginninnikkullu sulineq pillugu apeqqutit isummerfigineqarnissaannik piumasaqaateqarfiunera innersuussutigaa. Uanga Ombudsmanditut apeqqutinik taamaattumik naliliisinaanissannut suliatigut pisinnaasanik pisariaqartunik peqanngilanga, taamaattumillu apeqqutit taakkua isummerfiginiarnagit aalajangerlunga.

3.4. Oqaaseqaatinni Danmarkimi atuakkiaasut Folketingillu Ombudsmandiata periaasia arlalitsigut aallaavigisarpakka, tassami Kalaallit Nunaanni inatsiseqartitsinikkut tunngaviup Danmarkimi inatsiseqartitsinikkut tunngaviusoq pingaarnertigut assigimmagu. Tamanna innersuussutini taaneqartuni takuneqarsinnaavoq.

4. Aalajangiinerit aalajangersakkanik eqqortunik tunngaveqarluni pisimappat?

4.1. Inatsiseqartitsinikkut tunngavigisaq

4.1.1. Meeqqanik inuusuttunillu inissiisarneq meeqqat tapersersorneqarnisaat pillugu Inatsisartut inatsisaatigut nr. 20-kkut, 26. juni 2017-imeersukkut (matuma kingornatigut meeqqanik tapersersuisarneq pillugu inatsimmik taaneqartartussakkut) ilaatigut aalajangersaavigineqarsimavoq.

Meeraq angajoqqaatut oqartussaassusermik tigummiaraqtoq akuersitillugu angerlarsimaffimmi avataanut inissinneqassasoq kommunalbestyrelsi aalajangiisinaavoq, angerlarsimaffiup avataanut inissiineq meeqqap tapersorsorneqarnissamik immikkut pisariaqartitsinera naammassisinnaajumallugu anertuumik pingaaruteqarpat. Tamanna meeqqanik tapersersuisarneq pillugu inatsimmi § 27, imm. 1-ikkut imaattunik oqaasertaqartukkut aalajangersarneqarpoq:

§ 27. Kommunalbestyrelsip aalajangissavaa meeraq angerlarsimaffiup avataanut inissinneqassanersoq isumaginnikkut § 45 malillugu misissuinerup takutippagu, meeqqap ikiorserneqarnissaminut immikkut pisariaqartitaanik akuersinissamut annertuumik pingaaruteqartoq.”

Angerlarsimaffiup avataanut akuersisitsilluni inissiisoqannginnerani angajoqqaatut oqartussaassusermik tigummiaraqtoq allakkatigut akuersinera kommunip pissarsiariniassavaa. Meeraq inissinneqartussa 15-inik ukioqarpat meeqqap taassuma allakkatigut akuersinera aamma pissarsiarinarieqassaaq. Tamanna meeqqanik tapersersuisarneq pillugu inatsimmi § 50, imm. 1-ikkut aalajangersarneqarpoq. Meeqqanik tapersersuisarneq pillugu inatsimmi § 50 imaattunik oqaasertaqarpoq:

§ 50. Kommunalbestyrelsi angajoqqaanngortussanit imaluunniit angajoqqaatut oqartussaassusilimmit meeqqamiillu, taanna 15-inik ukioqalersimappat, ikiorsiinnissamik suliniuteqarnissamik, tak. § 21, immikkut ittunik ikiorsiinnissamik, tak. § 25, imaluunniit ikiorsiinnissamik suliniuteqarnernik sukannernerusunik, tak. § 27, taamaattoq tak. imm. 2, aalajangiisoqartinnagu, allaganngorlugu akuersissummik pissarsiniassaaq. Suliniuteqareernermi malitseqartitsinermik, tak. § 42, aalajangiisoqartinnagu, kommunalbestyrelsi meeqqamit imaluunniit inuusuttumit allaganngorlugu akuersissummik pissarsiniassaaq.

Imm. 2. Imm. 1-imi oqaaseqatigiit siullianni akuersissummik piumasaqarneq sarneqqunneqarsinnaavoq, ikiorsiinnissamik suliniuteqarnermik aallartitsinissaq meeqqap peqqissusaanut, ineriartorneranut peroriartorneranullu annertuumik pingaarutilittut isigineqarpat kiisalu ikiorsiinnissamik suliniuteqarneq akuersissummik pissarsinngikkaluarluni anguneqarsinnaasutut isigineqarpat.”

Angajoqqaatulli oqartussaassusermik tigummiqartup aamma meeqqap akuersitinneqarsimanissaannik piumasaaqaat saneqqunneqarsinnaavoq ikiorsi- nermik suliniuteqarnerup aallartinneqarnera meeqqap peqqissusianut, ine- riartorneranut peroriartorneranullu annertuumik pingaaruteqarpat kiisalu i- kiorsiinermik suliniuteqarnek akuersissummik peqangikkaluarluni angune- qarsinnaasoq naliliisoqarpat. Tamanna meeqqanik tapersersuisarneq pillugu inatsimmi § 50, imm. 2-kkut aalajangersarneqarpoq.

Kommunalbestyrelsi angajoqqaatut oqartussaassusermik tigummiqartoq meerarlu akuersitinnagit angerlarsimaffiup avataanut inissiisoqassasoq aam- mattaaq aalajangiisinnaavoq, meeqqap peroriartornerata, peqqissusiata ine- riartornerataluunniit, soorlu amigartumik isumassuineq innimiilliorfiginnin- nerluunniit pissutigalugit, ilungersunartumik ajoquserneqarnissaa aarlerinar- luinnarpat. Tamanna meeqqanik tapersersuisarneq pillugu inatsimmi § 28, imm. 1-ikkut imaattunik oqaasertaqartukkut aalajangersarneqarpoq:

“**§ 28.** Kommunalbestyrelsip angajoqqaatut oqartussaassusilik meerarluunniit a- kuersiteqqaarnagit meeqqap angerlarsimaffiup avataanut inissinneqarnissaa aala- jangissavaa, meeqqap peroriartorneranut, peqqissusianut ineriartorneranulluun- niit ilungersunartumik ajoquserneqarnissaa aarlerinarluinnarpat makku pissutiga- lugit:

- 1) meeqqamut amigartumik isumassuisoqarpat isumassuisoqangippalluunniit,
- 2) timikkut tarnikkulluunniit persuttaaneqarsimappat, paarsinerluttoqarsimappat kinguaassiutitigulluunniit innarliisoqarsimappat,
- 3) meeqqami imaluunniit meeqqap qanigisaanik atornerluinermik ajornartorsiute- qartoqarpat, pinerlunniartartoqarpat allatigulluunniit inuuniarnikkut annertuunik ajornartorsiuteqartoqarpat, imaluunniit
- 4) meeqqami meeqqalluunniit qanigisaanik pissutsikkut naleqqussarnissamut alla- tigulluunniit ajornartorsiuteqartoqarpat.”

4.1.2. Angerlarsimaffiup avataanut inissiineq inissiinermi siunertaasoq angu- neqarpat, inissiinerup siunertaa tunngavissaaruppat imaluunniit inuusuttoq 18-inik ukioqalerpat unitsinneqassaaq. Tamanna meeqqanik tapersersuisar-

neq pillugu inatsimmi § 40, imm. 1-ikkut 2-kkullu imaattunik oqaasertaqar-
tutigut aalajangersarneqarpoq:

§ 40. Ikorsiinissamik suliniuteqarnerit, ikorsiinissamillu suliniuteqarnerit im-
mikkut ittut kiisalu ikorsiinissamik suliniuteqarnerit sukannernerit, tak. kapitalini
7-9-mi aalajangersakkat, kiisalu tamakku pillugit suliniuteqareernermi malitseqar-
titsilluni suliniutit unitsineqassapput, taakku malillugit sulinermi anguniarneqar-
tut anguneqarpata, imaluunniit ikorsiinermik suliniuteqarnikkut siunertarineqartut
tunngavissaarukkaangata.

Imm. 2. Inatsisartut inatsisaat una malillugu ikorsiinissamik suliniuteqarnerit
kommunalbestyrelse suliniuteqareernermi malitseqartitsinissamik aallartitsisoqar-
nissaanik aalajangiinngippat, unitsineqassapput meeraq 18-inik ukioqalerpat ta-
kuuk § 42.”

Meeqqap angerlartinneqarnissaa kissaatigigini meeqqamut angerlarsimaffim-
mi avataanut inissinneqarsimasumut angajoqqaatut oqartussaassusermik ti-
gummiartup kommuni nalunaarfigippagu qinnutigisaq akuersarneqarsin-
naanersoq kommunip isummerfigissavaa.

Meeraq angerlartinneqassasoq kommunip aalajangiinnginnerani pissutsit ar-
lallit misissorneqassapput. Meeqqap pisariaqartitai angajoqqaatut oqartus-
saassusermik tigummiartup, pisariaqarpat ikorsiiniutinik ilaqartillugu,
naammassisinnaagai kommunip ilaatigut qulakkiissavaa. Tamanna meeqqan-
ik tapersersuisarneq pillugu inatsimmi § 41, imm. 1-ikkut aalajangersarne-
qarpoq. Meeqqanik tapersersuisarneq pillugu inatsimmi § 41, imm. 1 imaat-
tunik oqaasertaqarpoq:

§ 41. Angerlarsimaffiup avataani inissiinerup atorunnaarsinnissaa pillugu kom-
munalbestyrelsip aalajangiinissaa sioqqullugu, kommunalbestyrelsip qulakkeersi-
massavai:

- 1) angajoqqaatut oqartussaassusillip, ilaatigut Inatsisartut inatsisaat una malillu-
gu, ikiuinissamik suliniuteqarfigineqarluni meeqqap pisariaqartitaanik naammass-
sinnissinnaanera,
- 2) meeqqamik oqaloqatiginnittoqarsimanera, tak. § 43,
- 3) inissiiffiusumit allaganngorlugu oqaaseqaammik pissarsiniartoqarsimanera,
- 4) meeqqap angajoqqaallu angerlartitsinissamut piareersarluarsimanerat, aamma

5) § 46 naapertorlugu angerlartitsinissamut iliuusissanut pilersaarusiortoqarsi-
manera kiisalu meeqqap angajoqqaatullu oqartussaassusillip piffissami angerlar-
titsinerup siuninngua kingornalu meeqqap attaveqarfigisartagarisimasinnaasaasa
ikiorserneqarnissaannik piareersaasoqarsimanera.”

Meeqqanik tapersersuisarneq pillugu inatsit misissuineq kommunip ingerla-
tassaa pillugu arlalinnik piumasaqaateqarpoq. Kommuni inissiiviusup allakka-
tigut oqaaseqaataanik ilaatigut pissarsiniassaaq, angerlartitsinissaq pillugu i-
liuusissanut pilersaarut suliarissallugu meearlu aallaavittut oqaloqatigissal-
lugu. Tamanna meeqqanik tapersersuisarneq pillugu inatsimmi § 41, imm. 1-
imi nr. 2-kkut, 3-kkut 5-ikkullu aalajangersarneqarpoq.

4.1.3. Angerlartitsinissamik qinnutigisaaq kommunip qanoq pilertortigisumik
suliarisariaqarneraa siusinnerusukkut oqaaseqaammi isummerfigaara. Taa-
maalillunga 2019-2-mi oqaatigaara suliani angajoqqaatut oqartussaassuser-
mik tigummiqartup meeraq angerlarsimaffimmi avataanut akuersisitsilluni
inissinneqarsimasooq angerlartikkumallugu qinnuteqarfigisimasaani qinnutigi-
saaq akuersaarneqarsinnaanersoq kommunip sapaatit akunnerisa arlallit sivi-
sunerpaamilluunniit qaammatialunnguit ingerlaneranni isummerfigisariaqa-
raa.

2019-2-mi aamma oqaatigaara meeraq angajoqqaatut oqartussaassusermik
tigummiqartoq akuersitillugu inisseqqaarneqarsimappat, meearlu angerlar-
tineqarsinnaanngitsoq kommunip naliliiguni angerlarsimaffiup avataanut inis-
siineq atuutsiinnarsinnaagaa, tamanna pillugu piumasaqaataasut eqqortinne-
qarsimappata inissiineq akuersisitsinani inissiinertut ingerlaqqissasoq aalaja-
ngiinnermigut.

Angerlartitsinerli immini meeraq, angajoqqaatut oqartussaassusermik tigum-
miqartoq inissiiviusorlu sivikinnerpaamik sapaatit akunnerinik 12-inik sioq-
qutsilluni siumut ilimasaarneqareersimangippata pisinnaangilaq, meeqqap
mianerineqarnissaata mianerisassalluunniit annertuut allat ilimasaarinissa-
mut piffissaliussap taassuma saneqqunneqarnissaa pisariaqalersinngippas-

suk. Tamanna meeqqanik tapersersuisarneq pillugu inatsimmi § 41, imm. 3-
kkut imaattunik oqaasertaqartukut aalajangersarneqarpoq.

“§ 41. [...]

Imm. 3. Angerlartitsinissaq pisinnaangilaq meeraq, angajoqqaatut oqartussaas-
susilik inissiifillu minnerpaamik sapaatit akunnerinik aqqaneq-marlunnik sioqqut-
silluni nalunaarutigisimanngikkaanni, angerlartitsisoqarsinnaavorli meeqqap eq-
qarsaatigenera allaluunniit pingaarutillit eqqarsaatigenerat pissutigalugit sioqqut-
silluni ilimasaaruteqarnissap killissaanik saneqqutsisariaqalersitsillugu.”

4.2. Uanga aalajangiinernik pingasunik taakkuninnga naliliiviginnin- nera

4.2.1. Aalajangiineq 1

4.2.1.1. B1 qatanngutigiit sisamaallutik angajoqqaaminnut angerlartinneqar-
nissartik kissaatigigitsik taamani Qaasuitsup Kommuniusumut 20. oktober
2017-imi allakkami qatanngutinilu pingasut angerlarsimaffiup avataani inis-
sisimasimapput.

Qatanngutigiit sisamaallutik angerlarsimaffimmik avataani inissisimaannas-
sasut taamani Qaasuitsup Kommuniusoq B1-imut 25. oktober 2017-imi al-
lappoq. B1-ip qatanngutaasalu meeqqanik tapersersuisarneq pillugu inatsim-
mi § 27, imm. 3 tunngavigalugu inissinneqarsimanerat kommunip aalajangi-
nermi ilaatigut innersuussutigaa. Tamanna imatut paasivara kommunip inis-
siineq inatsimmi taannaasumik tunngaveqarluni aalajangiusimagaa.

Immikkoortumi 4.1.1-imi oqaatigineqartutut kommuni inissiisoqassasoq
meeqqanik tapersersuisarneq pillugu inatsimmi § 27, imm. 1 tunngavigalugu
aalajangiisinnaavoq. Meeraq 15-inik ukioqalersimappat kommunip aalaja-
ngiinnginnermini meeqqap akuersinera aallaavittut aamma pissarsiariniaq-
qaartussaavaa. Tamanna meeqqanik tapersersuisarneq pillugu inatsimmi §
27, imm. 1-ikkut aamma § 50, imm. 1-ikkut aalajangersarneqarpoq.

Meeqqanik tapersersuisarnej pillugu inatsimmi § 27, imm. 3-kkut aammataaq aalajangersarneqarpoq taamatut inissiineq kommunip suliamik suli misissuinerani aallartisarnejarsinnaasoq. Aalajangersagaq taanna imaattunik oqaasertaqarpoq:

“§ 27. [...]

Imm. 3. Meeqqamut pitsaanerpaasusaaq eqqarsaatigalugu meeqqap inissittariaqarnerata isumagininnermi sullissinikkut misissuineq iliuusissanullu pilersaarusiorneq utaqqisinnaangippagit, misissuinerup nalaani inissiineq kommunalbestyrelsip aallartissavaa.”

4.2.1.2. B1-imik inissiinerup aalajangiusimaneqarnissaanik aalajangiinerup imaattunik oqaaseqateqarnissannut pissutissaqalersippaanga.

Meeqqap 15-inik ukioqalersimasup angerlarsimaffimmi avataanut inissinneqarsimasup angajoqqaaminut angerlartinneqarnissani qinnutigippagu kommuni qanoq iliussanersoq meeqqanik tapersersuisarnej pillugu inatsimmi erseqqivissumik aalajangersaasoqarsimanngilaq. Uangali paasinninnera unaavoq taamatut pisoqartillugu inissiineq aalajangiusimaneqassanersoq meerarlunniit angajoqqaaminut angerlartinneqassanersoq kommunip isummerfigisariaqaraa.

Uanga paasinninnera unaavoq meeraq 15-it sinnerlugit ukiulik meeqqanik tapersersuisarnej pillugu inatsimmi § 27, imm. 1 tunngavigalugu inissinneqassappat kommunip meeqqamik aallavittut akuersisitsisimanissaanik piunasaqaat akuersisoqarpat inissiinerup attatiinnarneqarsinnaaneramik nassataqartoq. Taamaattumik kommunip angerlartitsiumanermik isummerfiginninnerani meeraq piunangikkaluartuq inissiineq attatiinnarneqassappat tamanna taamaallaat pisinnaasoq aalajangersagaq kommunip inissiinermik meeraq 15-it sinnerlugit ukiulik akuersitinnagu aalajangiussisimanissaanut periarfissiisoq tunngavigalugu.

Isumaqarpunga meeqqanik tapersersuisarnej pillugu inatsimmi § 27, imm. 3-p – taamani Qaasuitsup Kommuniusup aalajangiinermi innersuussutigisaa-

ta – meeqqap 15-it sinnerlugit ukiullip angerlartinneqarnissaminillu kissaateqartup inissisimatiinnarnissaanut kommuni periarfissinngikkaa. Aalajangersakkap taassuma misissuinerup ilaasa aalajangersimasut kinguartinnissaanut periarfissiinera ataqatigiinneqarnermi tassani sunniuteqanngilaq.

B1 angajoqqaaminut angerlartinneqarumalluni taamani Qaasuitsup Kommuniusumut allakkami 15-inik ukioqalereersimavoq. Taamaattumik uanga paasinninnera unaavoq Qaasuitsup Kommuniata, meeqqanik tapersersuisarneq pillugu inatsimmi § 27, imm. 3 innersuussutigalugu, B1-ip inissinneqarsimanagera aalajangiusimasinnaanngikkaa. Kommunilli inissiineq meeqqanik tapersersuisarneq pillugu inatsimmi § 28 tunngavigalugu aalajangiusimasinnaasimagaluarpa, tamatumunnga piumasaqaatit eqqortinneqarsimasuuppata.

Uanga paasinninnera unaavoq B1-ip inissinneqarsimanagera taamani Qaasuitsup Kommuniusumit akuersisitsilluni inissiineq pillugu malittarisassat tunngavigalugit aalajangiusimaneqarsimanagera kukkunerusoq ilungersunartoq.

4.2.1.3. Taamani Qaasuitsup Kommuniusup B1-ip qatanngutaasa – tamar-mik 15-it inorlugit ukioqartut – inissinneqarsimanagerinik akuersisitsilluni inissiisarneq pillugu aalajangersagaq tunngavigalugu aamma aalajangiusimanninnerata oqaaseqaateqarnissannut pissutissaqalersinngilaanga.

Uangali paasinninnera unaavoq aalajangiineq meeqqanik tapersersuisarneq pillugu inatsimmi § 27, imm. 1-imut, imanngitsoq § 27, imm. 3-mut suliamik paasissutissartalersuisarneq pillugu aalajangersaasumut, innersuussummik imaqarsimasuuppat tamanna eqqornerpaasimassagaluartoq.

4.2.2. Aalajangiinerit 2 aamma 3

4.2.2.1. Uanga paasinninnera unaavoq B5-ip angerlartinneqarnissaanik aalajangiineq (aalajangiineq 2) aamma B2-p, B3-p B4-llu angerlartinneqarnissaanik aalajangiineq (aalajangiineq 3) meeqqanik tapersersuisarneq pillugu inatsimmi § 40, imm. 1 innersuussutigalugu pisimasut. Tamatuma oqaaseqaateqarnissannut pissutissaqalersinngilaanga.

5. Aalajangiinerit nalunaarutigineqarneri

5.1. Inatsiseqartitsinikkut tunngavigisaq

5.1.1. Aalajangiinerit nalunaarutigineqartarnerat pillugu malittarisassat

5.1.1.1. Angerlartitsisoqarnissaanik aalajangiinerit angerlartitsoqarnissaa-luunniit itigartitsissutigalugu aalajangiinerit kimut nalunaarutigineqartassa-nersut meeqqanik tapersersuisarneq pillugu malittarisassat Kalaalliluunniit Nunaanni inatsisit allat aalajangersakkamik erseqqissumik imaqaanngillat. Aa-lajangersimasumilli ilimagineqarpoq oqartussaasup aalajangiinera aalajangi-i-nermi pineqartumut suliamilu allanik illua'tungiusoqarpat taakkununnga na-lunaarutigineqartassasoq.

Oqaaseqaat 2019-6 nittartakkanni www.ombudsmandi.gl-imi atuarneqarsin-naasoq ilaatigut innersuussutigaaara. Aammattaaq Jon Andersenip atuakkiaa-ni "Socialforvaltningsret"-imi arfineq aappassaannik naqitertinneqartumi (2019-imeersumi) qupperneq 384, Niels Fengerip allallu atuakkiaanni "For-valtningsret"-imi (2018-imeersumi) kapitali 15, pingaartumillu quppernerit 660 tullialu aamma Hans Gammeltoft-Hansenip allallu atuakkiaanni "For-valtningsret"-imi aappassaannik naqitertinneqartumi (2002-meersumi) qup-pernerit 602 tullialu innersuussutigaaakka.

Naatsumik oqaatigalugu inatsisilerineq pillugu atuakkiani manna nalinginnaa-sumik ilimagineqarpoq, tassalu suliami illua'tungiusumik oqarnermi inuit su-liap aalajangiivigineqarnerani annertuumik, inatsiseqartitsinermut attuumas-suteqartumik namminnerlu ataasiakkaarlutik soqutigisaqartut pineqartunut i-laatinneqartut. Taanna tassaasinnaavoq aalajangiinermi pineqartoq.

Meeqqat inuusuttullu 18-it inorlugit ukioqartut suliani imminnut tunngasuni inersimasut pinerattulli suliami illua'tungiusarput. Tamatuma saniatigut a-ngajoqqaat suliani meeqqaminnut tunngasuni suliami illua'tungiusutut inissi-

simasinnaapput. Taamaalillutik meeraq aamma angajoqqaatut oqartussaas-susermik tigummiartoq suliani meeqqat angerlarsimaffimmik avataanut i-nissinneqarnerinut tunngasuni suliami illua'tungiusarput.

Meeqqalli suliami illua'tungiunerata meeqqap suliami illua'tungiusutut pisin-naatitaanermik nammineq atuutsitsisinaanera ingerlaannaq nassatarin-gilaa. Inatsisilerineq pillugu atuakkiani tamanna meeqqap suliami illua'tu-ngiusinnaanera pillugu apeqquummik ilaanni taaneqartarpoq. Aatsaat meeraq suliami illua'tungiusinnaaguni suliami illua'tungiusutut pisinnaatitaanermik a-tuutsitsisinnaavoq.

Niels Fengerip allallu atuakkiaanni "Forvaltningsret"-imi (2018-imeersumi) quppernerit 97 tulliilu, pingaartumik qupperneq 104 aamma Jon Andersenip atuakkiaanni "Socialforvaltningsret"-imi arfineq aappassaannik naqitertinne-qartumi (2019-imeersumi) quppernerit 297 tulliilu, pingaartumik qupperneq 300, innersuussutigaakka.

5.1.2. Meeqqat suliami illua'tungiusinnaatitaanerit pillugu malittari-sassat

5.1.2.1. Meeqqat inuusuttullu 18-it inorlugit ukiullit (katissimangikkunik) nammineersinnaassuseqanngillat taamaattumillu angajoqqaatut oqartus-saassusermik tigummiartoq oqartussaaffigineqarlutik.

Angajoqqaatut oqartussaassusermik tigummiartoq pissutsit meeqqamat namminermut tunngasut pillugit aalajangiisarpoq. Tamanna angajoqqaat a-kisussaanerit pillugu inatsisip Kalaallit Nunaanni atuutilersinneqarnera pillu-gu peqqussummi nr. 680-imi, 6. juni 2016-imeersumi § 1-ikkut aamma § 2, imm. 1-ikkut imaattunik oqaasertaqartutigut aalajangersarneqarpoq:

§ 1. Meeqqat inuusuttullu 18-it inorlugit ukiullit katissimallutik aappariilersiman-ngikkunik angajoqqaanit oqartussaaffigineqarput.

§ 2. Angajoqqaap akisussaasup meeqqap isumassorneqarnissaa isumagissavaa, meeqqallu soqutigisai pisariaqartitaalu aallaavigalugit meeqqap inuttut atugai pil-lugit aalajangiisinnaalluni."

Taamaattumik angajoqqaatut oqartussaassusermik tigummiaqartup meeraq aallaavittut sinniisuuffigisinnaavaa meeqqallu suliami illua'tungiusutut pisin-naatitaanera atuutsissinnaallugu. Tamanna aalajangiinerit nalunaarutigine-qartarnerat pillugu malittarisassanut sunniuteqarpoq, tassami meeqqat pillu-git aalajangiinerit meeqqanut namminernut nalunaarutigineqartussaangim-mata, angajoqqaatulli oqartussaassusermik tigummiaqartumut nalunaaruti-gineqartassallutik, meeqqat suliami illua'tungiusutut pisinnaatitaangikkal-lartillugit.

Taamaakkaluartorli meeqqat pisariaqarneratut annertutigisumik inerisimas-suseqartut suliami illua'tungiusutut pisinnaatitaasutut isigineqarsinnaapput. Taamaannera Danmarkimi inatsisilerineq pillugu atuakkiani nutaajunerusuni ilimagineqarpoq. Niels Fengerip tamanna pillugu oqaatigaa "[...] meeqqat 15-inik ukioqalereersimasut suliami illua'tungiusutut aallaavittut pisinnaatitaas-sasut, nammineersinnaassuseqartuunnginnertik apeqqutaatinnagu" aamma "[...] meeqqat taakku inorlugit ukiullit pisumi naliliineq tunngavigalugu sulia-mi illua'tungiusutut pisinnaatitaasutut isigineqarsinnaasut". Jon Andersen al-lappoq "[...] inuusuttut 15-inik ukioqalersimasut suliami illua'tungiusutut na-linginnaasutigut iliorsinnaasut. Meeqqat 12-inik ukiullit sulilu ukiukinnerusut suliami illua'tungiusutut pisinnaatitaasutut aamma akuerineqarsinnaapput." (issuakkat Ombudsmandeqarfimmi nutsigaapput)

Niels Fengerip allallu atuakkiaanni "Forvaltningsret"-imi (2018-imeersumi) qupperneq 609 aamma Jon Andersen atuakkiaani "Socialforvaltningsret"-imi arfineq aappassaannik naqitertinneqartumi (2019-imeersumi) qupperneq 302 innersuussutigaakka. Aammattaaq Karsten Revsbechip allallu atuak-kiaanni "Forvaltningsret – Sagsbehandling"-imi arfineq pingajussaannik naqi-terttinneqartumi (2019-imeersumi) qupperneq 191 innersuussutigaara.

5.1.2.2. Meeqqat suliami illua'tungiusutut pisinnaatitaaffitik aalajangersimasut atuutsinniarsinnaagaat inatsisikkut toqqaannartumik aalajangersarneqarsimasinnaavoq. Taamaalilluni meeqqanik tapersersuisarneq pillugu inatsimmi § 60, imm. 2-kkut aalajangersarneqarpoq meeqqat suliani imminnut tunngasuni inatsit tunngavigalugu aalajangiiffigineqartuni naammagittaalliorsinnaatitaasut. Taamaalilluni tassani angerlartitsinissamik aalajangiineq imaluunniit itigartitsilluni aalajangiineq pineqartunut aamma ilaatinneqartussaapput. Meeqqanik tapersersuisarneq pillugu inatsimmi § 60, imm. 2 imaattunik oqaasertaqarpoq:

“§ 60. [...]

Imm. 2. Inatsisartut inatsisaat una malillugu aalajangersakkat naapertorlugit aalajangiinernut, meeqqat suliani imminnut tunngasuni, tak. imm. 1, naammagittaalliorsinnaatitaapput.”

Meeqqanik tapersersuisarneq pillugu inatsimmi § 60, imm. 2-mi naammagittaallior-nissamut periarfissamut tunngasumi meeqqat aalajangersimasunik ukiullit kisimik pineqarnersut takuneqarsinnaanngilaq. Tamannali aalajangersagaq pillugu immikkut oqaaseqaatini sukumiinerusumik allaaserineqarpoq, imaattunik oqaasertaqartumik:

“Aalajangersakkami aalajangiunneqarpoq meeraq naammagittaalliorsinnaatitaasoq. Tamanna inatsimmut ilanngunneqarpoq, Naalagaaffiit Peqatigiit Meeqqanut isumaqatigiissutaanni aalajangersarneqartoq meeqqat pisinnaatitaaffeqarnerat, qulakkeerumallugu. Meeqqat tamarmik tusarneqarnissaq pisinnaatitaaffigaat, meeqqamullu tunngasuni tamani peqataatinneqartussaalluni, naammagittaalliorsinnaanerullu ilanngunneqarnera tamatuminnga nukittorsaaneruvoq malunnaateqarluartoq. Aalajangersakkami aallaaviuvoq meeqqat qassinilluunniit ukioqaraluarunik tamarmik naammagittaalliorsinnaanerat, meeqqalli illersornissaa eqqarsaatigalugu kommunemi ingerlatsiviup meeqqap naammagittaalliorsinnaaneraniq ilit-sersuummi qulakkeertariaqarpaa suliani tamani ersarissumik meeqqamut ataatsimut tunngasuinnarmik nalilersuisarnissaq, meeqqap naammagittaalliornerup kingunerisinnaasai pillugit paasinninnissaminut naammattumik inerisimanera eqqarsaatigalugu. Eqqarsaatiginninnerit isumaliutiginninnerillu tamakku ingerlatsiviup meeqqamik naammagittaalliornermut ilit-sersuutaani ilaasariaqarput aammalu

naammagittaalliornermut ilitsersuummut atatillugu meeqqamut paasissutissiisu-
tineqarsimassallutik.” [Uanga ataatigut titagara]

Inatsimmut tunuliaqutaasoq inatsisillu pingaarnertut siunertaa meeqqanik ta-
persersuisarneq pillugu inatsit pillugu oqaaseqaatini nalinginnaasuni ilaatigut
imatut oqaatigineqarput:

“Siunnersuut tunngavigalugu oqartussaasut peqquneqarput meeqqanik taakkulu
pisinnaatitaaffiinik nutaaliaasumik paasinnittaaseqarneq aallaavigalu sulisarnis-
saannut.

Inatsisissatut siunnersuutip assigiinngitsutigut ilanngussivigaa Naalagaaffiit Peqa-
tigiit Meeqqat pillugit isumaqatigiissutaat, soorlu meeqqap imminut tunngasuni
suliani tusarniarneqartarnissaa. Siunnersuummi meeqqat innuttaasutut nammi-
neersinnaasutut isigineqarput, inuiaqatigiinni inersimasut imminnut pisinnaati-
taaffilersorneqartarnerat assigalugu pisinnaatitaaffillit. Naligiinneq aammalu nam-
minerisamik pisinnaatitaaffiit siunnersuummi ilaatigut sakkortusineqarput, asser-
suutigalugu meeqqap suliani imminut tunngasuni maalaaruteqarsinnaaneranut
tunngasutigut.” [Uanga ataatigut titagara]

5.1.3. Aalajangiinerit nalunaarutigineqartarnerat pillugu malittari- sassat aamma meeqqat suliami illua'tungiusutut pisinnaatitaanerat pillugu malittarisassat imminnut ataqatigiinneqarnerat

5.1.3.1. Uanga paasinninnera unaavoq meeqqat meeqqanik tapersersuisar-
neq pillugu inatsit tunngavigalugu aalajangiinerit pillugit inersimasutut ilillutik
naammagittaalliorsinnaanerisa meeqqanik tapersersuisarneq pillugu inatsit
pillugu oqaaseqaatini nalinginnaasuni oqaatigineqarnerat isumaqartoq mee-
qqat tamarmik inatsit tunngavigalugu aalajangiinerni suliami illua'tungiusutut
pisinnaatitaasut.

Taamaattumik angerlartitsisoqarnissaanik aalajangiineq angerlartitsisoqar-
nissaataluunniit itigartitsissutigineqarnissaanik aalajangiineq meeqqamut aa-
lajangiinermi pineqartumut aallaavittut nalunaarutigineqartussaassaaq.

Uangali paasinninnera unaavoq tamatuma sunut tamarluinnarnut atuutin-
nginnera pillugu aamma tunngavilersuuteqartoq. Taamaalillutik meeqqat u-
kiut aalajangersimasut inorlugit ukiullit suliami illua'tungiusutut pisinnaati-
taanerminnik atuisinnaanissaminut mikivallaarsinnaapput.

Meeqqanillumi tapersersuisarneq pillugu inatsimmi § 60, imm. 2 pillugu im-
mikkut oqaaseqaatinit qulaani issuarneqartunit aamma erserpoq "[a]alaja-
ngersakkami aallaaviuvoq meeqqat qassinilluunniit ukioqaraluarunik tamar-
mik naammagittaalliorsinnaanerat".

Aalajangersagaq aallaavittut saneqqunneqarsinnaanersoq oqaaseqaatini er-
seqqivissumik takuneqarsinnaannginnera tamatumunnga atatillugu eqqu-
maffigaara. Taarsiullugu oqaaseqaatini qulaani taaneqartuni 'aalajangersak-
kami aallaaviuvoq' matuma allaaserineqarneranik malitseqartinneqarpoq,
tassa kommunip suliat ataasiakkaarlugit matuma naliliiffigineqarnissaa qu-
lakkeertassagaa, tassalu meeraq naammagittaalliutitut suliap kinguner-
saanik paasinnissinnaanissaminut naammattumik inerisimassuseqarner-
soq, kommunillu meeqqamik naammagittaalliornissamut periarfissamik ilitser-
sui-
nini tamanna tunngavigalugu naleqqussassagaa.

Tamanna imatut paasivara meeqqat suliami meeqqanik tapersersuisarneq
pillugu inatsit tunngavigalugu suliarineqartuni suliami illua'tungiusutut pisin-
naatitaasut – kommunilli suliami suliarinninneq meeqqap inissinneqarsima-
sup qassinik ukioqarnera tunngavigalugu naleqqussassagaa.

Uanga paasinninnera unaavoq malittarisassanik taamatut isiginneriaaseq
matumunnga ikorfartorneqartoq, tassalu meeqqap suliami angerlartitsiner-
mut tunngasumi peqataatinneqarnera kommunip allatigut aamma killilersin-
naagaa. Taamaalilluni angerlartitsisoqarnissaanik aalajangiisoqannginnerani
meeraq nalinginnaasutigut oqaloqatigineqartassaaq, oqaloqatigiinnerli taan-
na pinngitsoortinneqarsinnaavoq, ilaatigut meeqqap inerisimassusia eqqar-
saatigalugu. Meeqqanik tapersersuisarneq pillugu inatsimmi § 41, imm. 1, nr.
2 qulaani immikkoortumi 4.1.2-mi issuarneqartoq kiisalu § 43, imm. 1 aam-
ma 3 imaattunik oqaasertaqartut innersuussutigaa:

“§ 43. Kapitalini 8-9-mi aalajangersakkat naapertorlugit meeqqamik ikiorsiinissamik suliniuteqarnernik kiisalu kapitali 11-mi aalajangersakkat naapertorlugit ikiorsiinissamik suliniuteqarnernik unitsitsinissanik aalajangiisoqalersinnagu, meeraq oqaloqatigineqaqqaassaaq.

[...]

Imm. 3. Oqaloqatigiinnissaq pinngitsoortinneqarsinnaavoq meeqqap perorsimasusia imaluunniit oqaloqatigiinnerup ingerlanneqarnissaanut suliap qanoq ittuunerationa aalajangiisumik oqaloqatigiinnissaq pissanngitsutut isikkoqartippagu. Oqaloqatigiinneq naammassineqarsinnaanngippat, aalajangiinissatut eqqarsaatigineqartumut meeqqap isumaa allatut iliornikkut pissarsiariniarneqassaaq.”

Meeqqamik angerlarsimaffiup avataanut akuersisitsilluni inissiisoqarnissaanik aalajangiinerni meeraq aatsaat 15-it sinnerlugit ukioqarpat meeqqap akuersinissaa aammattaaq piumasqaataavoq. Tamanna meeqqanik tapersersuisarnej pillugu inatsimmi § 50, imm. 1-ikkut aalajangersarneqarpoq. Ungali paasinninnera unaavoq meeqqat 15-it sinnerlugit ukiullit angerlartitsisoqarnissaanik imaluunniit angerlartitsisoqarnissaata itigartitsissutigineqarnissaa-nik aalajangiinert pillugit tamatigut nalunaarfigineqartartussaasut.

Uanga tamanna tunngavigalugu paasinninnera unaavoq kommunit pisuni pi-sullu ataasiakkaarlugit meeqqap inerisimassusianik suliamillu paasinninneranik naliliinermikkut suliani angerlartitsinernut tunngasuni aalajangiinernik meeqqanut aalajangersimasunut 15-it inorlugit ukiulinnut nalunaarutiginninngitsoorsinnaasut. Ungali paasinninnera unaavoq meeqqat 12-it 15-illu akornanni ukiullit amerlanersaat pisariaqarneratut annertutigisumik inerisimasuseqarlutillu paasinnittartut, taamalu aalajangiinermik nalunaarfigineqartussaasut.

Oqaatigaara paarlattuanik pisoqarpat – tassalu suliani angerlartitsinernut tunngasuni aalajangiinert tamakkerlutik meeqqamut inissinneqartumut nalunaarutigineqartussaappata – tamanna kommunit angerlartitsisoqarnissaa-nik aalajangiinernik imaluunniit angerlartitsisoqarnissaata itigartitsissutigineqarneranik aalajangiinernik naalungiarsunnut tamatigut nalunaaruteqartar-

tussaanerannik nassataqassasoq. Malittarisassanik taamatut paasinninneq ilalersinnaanngilara.

5.1.3.2. Meeqqap suliami illua'tungiusutut pisinnaatitaasutut isigineqarnera-ta manna aamma allanngortinngilaa, tassalu angajoqqaatut oqartussaassusermik tigummiagartup meeqqap suliami illua'tungiusutut piginnaatitaaneriniq sulii atuutsitsisinnaatitaanera.

Taamaattumik oqartussaasup suliami illua'tungiusutut piginnaatitaanernik atuutsitsisut marluk taakku ataqqissavai, suliami illua'tungiusup aappaata mattunnissaanut inatsisikkut tunngavissaliisoqarsimanngippat. Oqartussaasup suliamik suliarinninnini tamatumunnga naleqqussartariaqarpaa, soorlu aalajangiinernik meeqqamut aamma angajoqqaatut oqartussaassusermik tigummiagartumut nalunaaruteqartarnermigut.

Niels Fengerip allallu atuakkiaanni "Forvaltningsret"-imi (2018-imeersumi) qupperneq 610 aamma Jon Andersen atuakkiaanni "Socialforvaltningsret"-imi arfineq aappassaannik naqitertinneqartumi (2019-imeersumi) quppernerit 302 tulluulu innersuussutigaa. Aammattaaq Folketingip Ombudsmandiata oqaaseqaataa 2019-29, pingaartumik oqaaseqaatip immikkoortua 4.2.2, innersuussutigaa.

5.1.4. Allakkatigoortitsisarneq pillugu malittarisassat

5.1.4.1. Aalajangiinerit oqaasiinnartigut allakkatigulluunniit aallaavittut nalunaarutigineqarsinnaapput.

Ingerlatsineq pillugu inatsiseqartitsinerimi aalajangiinerit allakkatigut nalunaarutigineqartarnissaat pillugu nalinginnaasumik malittarisassaqaanngilaq. Meeqqanik tapersersuisarneq pillugu inatsit angerlartitsisoqarnissaanik aalajangiinerit imaluunniit angerlartitsisoqarnissaata itigartitsissutigineqarneranik aalajangiinerit allakkatigoortinneqartarnissaat pillugu malittarisassanik aamma imaqaanngilaq.

Ingerlatsinermili ileqqorissaarnerup manna nassataraa, tassalu aalajangiineq aalajangiinermi pineqartumut nanertuisuusooq oqaasiinnartigut nalunaarutigineqartoq allakkatigut uppersarsarneqartariaqartoq, immikkullu akuliuffiusumik aalajangiinerit pissutsit qanoq issusiat apeqqutaatillugu allakkatigut nalunaarutigineqartariaqartut.

Oqaaseqaatinni 2018-4, pingaartumik immikkoortoq 3.4, ilaatigut innersuussutigaa. Oqaaseqaat taanna inatsisilerineq pillugu atuakkianut Folketingillu Ombudsmandiata periaasianut innersuussutinik arlalinnik imaqarpoq.

5.1.4.2. Uanga paasinninnerigallagara unaavoq angerlartitsisoqarnissaanik aalajangiineq imaluunniit angerlartitsisoqarnissaata itigartitsissutigineqarneranik aalajangiineq meeqqamut inissinneqartumut aamma meeqqamut angajoqqaatut oqartussaasusermik tigummiqartumut taama sunniuteqartigigami allakkatigut nalunaarutigineqartariaqartoq, imaluunniit aalajangiineq oqaasiinnartigut nalunaarutigineqarnermi kingornatigut allakkatigut pilertortorujussuarmik uppersarsartariaqartoq. Uanga naliliivunga tamanna atuuttoq, meeqqap angajoqqaatulluunniit oqartussaasusermik tigummiqartup aalajangiinermut isumaqataanerat apeqqutaatinnagu.

Isummat tamatuma pissuseqatai Folketingip Ombudsmandiata oqaaseqaatani 2018-33-miittut innersuussutigaa. Tamatuma saniatigut Niels Fengerip atuakkiaani "Forvaltningsret"-imi (2018-imeersumi) quppernerit 627 tulliiilu, Karsten Revsbechip allallu atuakkiaanni "Forvaltningsret – Sagsbehandling"-imi arfineq pingajussaannik naqitertinneqartumi (2019-imeersumi) quppernerit 305 tulliiilu aamma Niels Fengerip atuakkiaani "Forvaltningsloven med kommentarer"-mi 2013-imeersumi quppernerit 604 tulliiilu innersuussutigaa.

5.2. Uanga aalajangiinernik pingasunik taakkuninnga naliliiviginnin- nera

5.2.1. Aalajangiineq 1

5.2.1.1. Taamani Qaasuitsup Kommuniusup B1 qatanngutaalu angerlartitsinissamik qinnutigisap itigartinneqarneranik allakkatigut 25. oktober 2017-imeersutigut nalunaarfigai. Suliami allagaatit imatut paasivakka aalajangiineq B1-ip saniatigut kommunip allanut nassiussimanngikkaa, aamma B1-ip angajoqqaavinut qatanngutaanulluunniit nassiussimanagu.

Kommunip angerlartitsisoqarnissaanik aalajangiinernik imaluunniit angerlartitsisoqarnissaata itigartitsissutigineqarneranik aalajangiinernik B1-imut nalunaaruteqarsimanerata oqaaseqaateqarnissannut pissutissaqalersinngilaanga.

Eqqortussarli anguniarlugu oqaatigaara taamani Qaasuitsup Kommuniusup nalunaarut B1-ip qatanngutai ataasiakkaarlugit tamanut nassiussimasiariaqaraluarneraa imaluunniit kommuni taamaaliunngitsoorsinnaasimanersoq isummerfiginiarnagu aalajangertunga.

Meeqqap suliami illua'tungiusutut pisinnaatitaanera immini angajoqqaatut oqartussaassusermik tigummiagartup meeqqap soqutigisaanik isumaginnikkunnaarneranik nassataqanngilaq. Siuliini immikkoortoq 5.1.3.2. innersuusutigaa. Tassani aamma ilaavoq angajoqqaatut oqartussaassusermik tigummiagartup nammineq suliani meeqqanik inissiinernut angerlartitsinernullu tunngasuni illua'tungiunera.

Taamaattumik uanga paasinninnera unaavoq angerlartitsinerup itigartitsissutigineqarnissaanik aalajangiineq taamani Qaasuitsup Kommuniusup nammineq suliniuteqarnermigut aamma angajoqqaatut oqartussaassusermik tigummiagartunut allakkatigut nalunaarutigisimasussaagaluaraa.

5.2.2. Aalajangiineq 2

5.2.2.1. Uanga paasinninnera unaavoq B5-ip anaanaa, M, B5-ip sapaatit akunnerisa 12-it qaangiunneranni angerlartinniarneqarneranik Avannaata Kommuniata 28. november 2018-imi nalunaarfigisimagaa. Aammattaaq ima-

tut paasivara aalajangiineq M-ip tigusimagaa, angajoqqaatummi oqartussaassusermik tigummiaqartuugami.

Suliami allattuiffimmi 27. november 2018-imi ullulernerqarsimasumi suliamik suliarinnittumit "M aqagu oqaloqatigisussaavara, paasissutissaq meeqqap angerlarsinnaalerneranut tunniunneqassaaq, taannalu sap. ak. 12-it qaangiupata pissasoq" allanneqarsimanera innersuussutigaa.

Suliami allagaatit aallaavigalugit imatut paasivara B5 4. marts 2019-imi angerlartinneqarsimasoq, angerlartitsinerlu Avannaata Kommuniani ilaqutariinnermut ataatsimiititaliap 9. maj 2019-imi akuerisimagaa.

Ilaqutariinnermut ataatsimiititaliamut inassuteqaat ullulernerqarsimanngitsoq suliamilu allattuiffiit 18. februar 2019-imeersoq, 1. marts 2019-imeersoq aamma 25. april 2019-imeersoq kiisalu Avannaata Kommuniata uannut allagai 21. august 2020-meersut kommunillu M-imut allagai 29. juli 2020-meersut ilaatigut innersuussutigaa.

Mappi suliami allagaatinik B5-imut tunngasunik imalik sulisuma illoqarfimmi B-miinnerminni misissorpaat. Mappi suliami allagaatinik imalik B5-imik angerlartitsineq pillugu allakkatigut aalajangiinerup assilineranik imaqqangi-laq.

Avannaatali Kommuniata M-imut allagaani 29. juli 2020-meersuni B5-ip angerlartinneqarnerata kommunimit akuerineqarnera M-imut ilisimatitsissutigineqarpoq.

Tamanna tunngavigalugu uanga paasinninnera unaavoq M angajoqqaatut oqartussaassusermik tigummiaqartutut angerlartitsineq piffissarluunniit angerlartitsiviususaaq pillugit aalajangiinermik allakkatigut nalunaarfigineqarsimanngitsoq. M B5-ip angerlartinneqarnerata akuerineqarneranik aatsaat 29. juli 2020-mi nalunaarfigineqarpoq. Tassa B5-ip angerlartinneqarnerata kingornatigut ukiup ataatsip qaammatillu pingasut sinnerlugit qaangiunne-

ranni, kiisalu kommunip angerlartitsinissamik aalajangiinerata kingornatigut ukiup ataatsip qaammatillu arfineq marluk missaasa qaangiunneranni.

Uanga paasinninnera unaavoq Avannaata Kommuniata M angerlartitsineq piffissarlu angerlartitsiviususaaq pillugit aalajangiinermik allakkatigut nalunaarfigisimasariaqaraluaraa, imaluunniit aalajangiinerup oqaasiinnartigut nalunaarutigineqarnerata kingornatigut aalajangiineq pilertortorujussuarmik allakkatigut uppersarsimasariaqaraluaraa. Isumaqarpunga B5-ip angerlartinneqarnissaanik kommunip aalajangiinerata kingornatigut ukiup ataatsip qaammatillu arfineq marluk missaasa qaangiunneranni nalunaaruteqarneq naammattumik pilertussuseqanngitsoq.

5.2.2.2. Aammattaaq manna tunngaviutippara, tassalu Avannaata Kommuniata B5 angerlartitsinissaaq pillugu aalajangiinermik nalunaarfigisimanngikkaa. B5-ip taamatut aalajangiinermik kommunimit nalunaarfigineqarsimasinnaananut suliami allagaatini uppersaatissaqannginnera innersuussuti-gaara.

Taamaattumik B5 suliami illua'tungiusutut pisinnaatitaanissamut naammattumik inerissimassuseqartoq kommuni naliliippat Avannaata Kommuniata taanna aalajangiinermik allakkatigut nalunaarfigisussaasimagaluarpa. Avannaata Kommunia angerlartitsisoqarnissaanik aalajangiimmat B5 sisamanik ukioqarpoq. B5-ip ukiui immikkoortumilu 5.1.3-mi oqaaseqaatikka innersuussutigalugit isumaqarpunga kommunip B5 angerlartitsisoqarnissaanik aalajangiinermik nalunaarfigisimasariaqaraluaraa oqarlunga inerniliinissannut tunngavissaqarnanga.

5.2.3. Aalajangiineq 3

5.2.3.1. Avannaata Kommuniata B2-p, B3-p aamma B4-p angerlartinneqarnissaannik aalajangiineq meeqqat angajoqqaavinut allakkatigut 15. november 2019-imi nalunaarutigaa. Tamanna imatut paasivara taakku angajoqqaatut oqartussaassusermik tigummiaqartuunertik pissutigalugu nalunaarummik tigusaqarsimasut.

Paasissutissat sulisuma Avannaata Kommuniani 2020-mi februarimi illoqarfimmi B-mi ataatsimiinnerni tigusaat aallaavigalugit imatut paasivara B2, B3 aamma B4 angerlartitsineq pillugu taamaallaat oqaasiinnartigut kommunimit nalunaarfigineqarsimasut.

Oqaatigaara suliami allagaatit aallaavigalugit manna paasiuminaatsikkiga, tassalu meeqqat pingasut taakku aalajangiinermik qanga paasitineqarsimangersut – imaluunniit meeqqat paasissutissanik sorpianik kommunimit tamatumunnga atatillugu tigusaqarsimangersut.

Mappit suliami allagaatinik meeqqanut tunngasunik imallit angerlartitsisoqarnissaanik aalajangiineq pillugu nalunaarummik meeqqat angajoqqaavinut ingerlatitaasumik taamaallaat imaqarput. Taamaattumik uanga paasinninnera unaavoq meeqqat pingasut taakkua arlaannaalluunniit angerlartitsisoqarnissaanik aalajangiinermik allakkatigut nalunaarfigineqarsimanngitsoq.

Paasissutissat sulisuma Avannaata Kommunianik illoqarfimmi B-mi ataatsimeeqatiginninnerminni tigusaat aallaavigalugit imatut paasivara meeqqat aalajangiinermik oqaasiinnartigut nalunaarfigineqartarnerat nalinginnaasumik periaatsimut ingerlatsiviup suliani taamaattuni atortagaanut takussutissasoq, meeqqallu inerisimassusiannik imaluunniit suliami illua'tungiusutut pinsinnaatitaanerannik pisut ataasiakkaarlugit naliliinerup inernerinagu.

Uanga paasinninnera unaavoq Avannaata Kommuniata B2, B3 aamma B4 angerlartitsisoqarnissaanik aalajangiinermik allakkatigut nalunaarfigisimasiaqaralarai.

5.2.3.2. Aammattaaq oqaatigaara aalajangiineq 15. november 2019-imeersoq meeqqat qaqugukkut angerlartinneqarnissaat pillugu paasissutissanik imaqanngitsoq.

Meeqqanik tapersersuisarneq pillugu inatsimmi § 41, imm. 3-kkut aalajangersarneqarpoq meeraq, angajoqqaatut oqartussaassusermik tigummiaraq-

toq inissiivillu sapaatit akunnerinik aqqaneq marlunnik sioqqutsilluni kalerrin-
neqareersimangippata angerlartitsisoqarsinnaanngitsoq, meeqqap mianeri-
neqartariaqarnerata imaluunniit mianerisassat allat kalerriinissamut piffissa-
liussap taassuma saneqqunneqarnissaa pisariaqalersinngippassuk.

Uanga paasinninnera unaavoq kommunip meeraq angerlartinneqassasoq aa-
lajangiisoqartoq nalunaarutigeriarlugu kingusinnerusukkut - soorlu angallan-
nermut periarfissat misissoreerlugit - angerlartitsinerup qaqugukkut pinissaa-
nik immikkut aalajangiinissaanut akornutissaqanngitsoq. Uangali imatut paa-
sivara Avannaata Kommunia suliame tassani piffissaq angerlartitsiviusoq pillu-
gu allakkatigut aalajangiinermik kingusinnerusukkut aamma suliarinnissi-
manngitsoq.

Tamatumunnga atatillugu oqaatigaara uanga paasinninnera unaasoq mee-
qqap inissinneqarsimasup angerlartinneqarnissaanut piffissaq pillugu aalaja-
ngiineq allakkatigut nalunaarutigineqarpat, imaluunniit aalajangiineq oqaa-
siinnartigut nalunaaruteqarnerup kingornatigut allakkatigut pilertornerpaa-
mik nalunaarutigineqarpat, tamanna ingerlatsinermi ileqqorissaarnermut
naapertuunnerpaassasoq. Uanga naliliinera unaavoq allakkatigut aalajangi-
nerup aalajangiinermik tiguisoq soorlu angerlartitsinissamut piffissaliussaq
pillugu naammagittaalliorumanerluni isummernissaanut pitsaanerpaamik
tunngavissalissagaa.

6. Tunngavilersuineq naammagittaalliornissamullu periarfissap ilit- sersuutigineqarnera

6.1. Inatsiseqartitsinikkut tunngavigisaq

6.1.1. Angerlartitsisoqarnissaanik aalajangiineq ingerlatsinermik inatsiseqar-
titsineq pillugu malittarisassanik nalinginnaasunik pisortat ingerlatsineranni
suliassat suliarineqartarnerat pillugu Inatsisartut inatsisaatigut nr. 8-kkut,
13. juni 1994-imeersukkut kingusinnerusukkut allannguuteqartinneqarsima-
sukkut (matuma kingornatigut suliassat suliarineqartarnerat pillugu inatsim-

mik taaneqartartussakkut) aalajangersarneqartunik eqqortitsisunngorlugu ilusilersorneqassaaq.

Suliassat suliarineqartarnerat pillugu inatsimmi § 22-p manna nassataraa, tassalu allakkatigut aalajangiinerit tunngavilersuummik ilaqartinneqartassasut, suliame illua'tungiusumut pineqartumut tapersiisuulluinnangikkunik. Suliassat suliarineqartarnerat pillugu inatsimmi § 22 imaattunik oqaasertaqarpoq:

§ 22. Aalajangiineq allakkatigut nalunaarutigineqaruni aalajangiinermut tunngaviusumik ilaqartinneqassaaq, suliame peqataasumut tassunga tapersiisuulluinnangikkuni."

Tunngavilersuut inatsimmi malittarisassanut aalajangiinermi tunngavigineqartunut innersuussummik imaqartassaaq. Aalajangiineq aqutsinermi allaffissornikkut missingiussilluni naliliinermik tunngaveqarpat pingaarnertut isiginiarneqartut missingiussilluni naliliinermi aalajangiisuusimasut tunngavilersuummi aamma oqaatigineqartassapput. Kiisalu tunngavilersuut tamanna pisariaqarpat suliame pissusiviusut aalajangiinermut annertuumik sunniuteqartinneqarsimasut pillugit paasissutissanik imaqartassaaq. Suliassat suliarineqartarnerat pillugu inatsimmi § 24, imm. 1 aamma 2 imaattunik oqaasertaqartut innersuussutigaaqka:

§ 24. Aalajangiinermut tunngaviusumik nalunaarummi innersuussutigineqassapput inatsisini maleruaqqusat aalajangiinermi tunngavigineqartut. Maleruaqqusat tamakku malillugit aalajangiineq oqartussaasuni sulisut isumaannik tunngaveqarpat tunngaviusumik nalunaarummi taaneqassapputtaaq pissutaasut pingaarnersut isummat tamakkua atornerannut aalajangiisuunerusut.

Imm. 2. Tunngaviusumik nalunaarummi pisariaqarpat naatsumik erseqqissarneqassapputtaaq paasissutissat suliame pissusiviusunut tunngasut aalajangiinermi annertuumik pingaartinneqartut."

Naatsumik oqaatigalugu tunngavilersuut aalajangiinerup taamatut imarisa-minik sooq imaqalersimanera pillugu nassuiaatitut isikkoqartassaaq. Taman-

na suliassat sularineqartarnerat pillugu inatsit pillugu oqaaseqaatinit erserpoq.

Tunngavilersuutip imarisaa pisuni immikkut ittuni suliame illua'tungiusup soqutigisaanik mianerinninnermit killilerneqarsinnaavoq. Tamanna suliassat sularineqartarnerat pillugu inatsimmi § 24, imm. 3-kkut imaattunik oqaasertaqartukut aalajangersarneqarpoq:

“§ 24. [...]

Imm. 3. Tunngaviusumik nalunaarutip imarisai killiliiffigineqarsinnaapput suliame peqataasup tamakkununnga ilisimasaqarnini nammineq iluaqutigiumallugu atuiumasinnaanerminik soqutiginninnera inuk taanna nammineq eqqarsaatigalugu imaluunniit inuinaat allat pisortalluunniit soqutigisaat pissutiginerullugit minnerutitartariaqartutut isumaqarfiginarpas, tak. § 15.”

6.1.2. Allakkatigut aalajangiinerit ingerlatsinermi oqartussaasumut allamut naammagittaalliuutigineqarsinnaasut naammagittaalliornissamut periarfissaq pillugu ilitersuummik aammattaaq ilaqartinneqartassapput, naammagittaalliuummik tunniussinermi periaaseq pillugu paasissutissartalimmik, matumani piffissaliussaqaqpat taanna ilanngullugu eqqarsaatigalugu. Tamannali atuutinnigilaq aalajangiineq suliame illua'tungiusumut pineqartumut tapersiisuullinnarpas. Tamanna suliassat sularineqartarnerat pillugu inatsimmi § 25-kkut imaattunik oqaasertaqartukut aalajangersarneqarpoq:

“§ 25. Aalajangiinerit ingerlatsinermut oqartussaasunut allanut naammagittaalliuutigineqarsinnaasut allakkatigut nalunaarutigineqarunik naammagittaalliorsinnaanermut ilitersuummik ilaqartinneqassapput tassuuna nalunaarlugit naammagittaallioortarfik naammagittaalliuussagaannilu qanoq iliortariaqartoq immaqalu aamma ullut qassit qaangiutsinnagit naammagittaallioortariaqartoq. Tamakkuninngali ilaqartinneqassanngillat aalajangiineq aalajangiiffigineqartumut tapersiisuulluinnarsimappat.

Imm. 2. Naalakkersuisut maleruagassaliorsinnaapput ingerlatsinermi suliame ilaat erseqqinnerusumik taaneqartut, pissuteqartumik immikkut isigisariaqartut, pillugit naammagittaalliornissamut ilitersuummik ilanngussaqaqannginnissaq imaluunniit imm. 1-imi ilitersuutigineqartumit allaasumik naammagittaallioortoqarsinnaanera pillugit.”

Kommunit meeqqanik tapersersuisarneq pillugu inatsit tunngavigalugu aalajangiineri Isumaginninnermi Naammagittaalliuuteqartarfimmut isumaginnittoqarfiup aqunneqarnera aaqqissuussaanelu pillugit Inatsisartut peqqussutaat nr. 11, 12. november 2001-imeersoq tunngavigalugu naammagittaalliutigineqarsinnaapput. Tamanna meeqqanik tapersersuisarneq pillugu inatsimmit § 60, imm. 1-ikkut imaattunik oqaasertaqartukkat aalajangersarneqarpoq:

“§ 60. Kommunalbestyrelsen Inatsisartut inatsisaat una malillugu aalajangigai Isumaginninnermi Naammagittaalliuuteqartarfimmut naammagittaalliutigineqarsinnaapput isumaginnittoqarfiup aqunneqarnera aaqqissuunneqarneralu pillugit Inatsisartut peqqussutaanni aalajangersakkat malillugit.”

6.2. Suliani angerlartitsinernut tunngasuni qaqugukkat “tapersiisuulluinnartoqartarnera” pillugu oqaaseqaatikka

6.2.1. Siuliani oqaatigineqartutut suliassat sularineqartarnerat pillugu inatsimmi §§-tigut 22-kkut aamma 25-kkut aalajangersarneqarpoq ingerlatsiviup allakkatigut aalajangiineri tunngavilersuummik ilaqartinneqartassasut, ingerlatsinermilu oqartussaasumut allamut naammagittaalliutigineqarsinnaagunik naammagittaalliornissamut periarfissaq pillugu ilitsersuummik aamma ilaqartinneqartassasut, suliame illua'tungiusumut tapersiisuulluinnanngikkunik.

Meeraq angerlarsimaffimmi avataanut inissinneqarsimasoq angerlartinneqarsinnaanersoq kommunip isummerfigigaangamiuk apeqqutit marluk uku isummerfigigajuttartussaavai:

- meeraq angerlartinneqarsinnaava, aamma
- taamaappat meeraq qaqugukkat angerlartinneqarsinnaava.

Uanga paasinninnera unaavoq kommunip apeqqutinik marlunnik taakkuninnga isummerfiginninnera angerlartitsisoqarnissaanik aalajangiineq suliame il-

lua'tungiusunut tapersiisuulluinnarnersoq naliliiniarnermi ilaatinneqartariaqartoq.

Angajoqqaatut oqartussaassusermik tigummiaqartoq meerarluunniit angerlarsimaffimmi avataanut inissinneqarsimasoq angerlartitsisoqarnissaanik qinnuteqarpat itigartinneqarlunilu tassani aalajangiineq pineqartumut tapersiisuulluinnanngitsoq pineqarpoq. Tamatuma pissuseqataa atuuppoq angerlartitsisoqarsinnaasoq, tamannali qinnutigineqartumit kingusinnerusukkut aatlaat pisinnaasoq aalajangiisoqarpat.

Tamatuma saniatigut atugassarititaasut, piumasaqaatit assigisaalluunniit aalajangiinermut atatinneqarsinnaapput, taakkulu suliami illua'tungiusup tamakkiisuunngitsumik taparserneqarneranut takussutissaasinnaapput.

6.2.2. Uanga paasinninnera aamma unaavoq pisup immikkut ittup matuma isumaliutersuutiginnissaanut tunngavissaqarsinnaasoq, tassalu angerlartitsiumalluni qinnutigisaq akuerineqarpat tamanna meeqqap angerlarsimaffimmi avataanut inissinneqarsimasutut inissisimanagera pissutigalugu tapersiisuulluinnartumik aalajangiinermut ilumut takussutissaanersoq.

Apeqqutip taassuma isummerfiginnissaanut siusinnerusukkut periarfissaqarsimanngilanga. Tunngavilersuisarnerli naammagittaalliornissamullu periarfissap ilitersuutigineqartarnera pillugit malittarisassat eqqarsaatigalugit Danmarkimi malittarisassat Kalaallillu Nunaanni malittarisassat assigiinnerat pillugu oqaatigineqartut eqqarsaatigalugit Folketingip Ombudsmandiata suliami FOB 2018-33-mi ilaatigut makku oqaatigai:

“Meeqqap inissinneqarsimasup inuusuttulluunniit inissinneqarsimasup angerlartinneqarnissani kissaatigigini oqaatigippagu isumaqarpunga meeqqap inuusuttulluunniit angerlartinneqarnissaanik aalajangiineq pineqartumut tapersiisuulluinnartuusooq eqikkaalluni inerniliinissap assut tunuarsimaarfigineqarnissaanut pissutissaqartoq.

Uanga paasinninnera unaavoq angerlartinneqarnissamik kissaateqarneq meeqqap inuusuttulluunniit qassinik ukioqarnerata inersimarpalussusiatalu saniatigut

meeqqap inuusuttulluunniit angajoqqaanut pissuseqarnerminik illua'tungaaticullu inissisimaannarnissamik kissaateqarsinnaanermik aporaattoorfiusumiissinnaanera isiginiarlugu aamma naliliiffigineqartariaqartoq. Tassani aamma ilaavoq meeqqap inuusuttulluunniit angerlartitsinissamik aalajangiinerup kingunerisaanik imaaliallaannaq paasiuminaatsitsisorujussuusinnaanera, matumani angerlartitsinermut taartaasinnaasunik angerlartitsinermulluunniit atatillugu tapersersuinernut suliniutinullu taartaasinnaasunik ilisimasaqangissinnaanera ilanngullugu eqqarsaatigalugu.

Meeraq inuusuttorluunniit angerlartitsisoqarnissaa pillugu allakkatigut aalajangiinermik tunngavilersugaasumik naammagittaalliornissamullu periarfissaq pillugu ilitsersuutitalimmik tigusaqarpat tamatuma meeraq inuusuttorluunniit aalajangiinerup kingunerisaanik paasinninnissaanut suliallu soorlu attaveqarfigisartakkaminut siunnersortiminullu oqaloqatiginnissutiginnissaanut pitsaanerpaanik tunngavisaqalersissavaa, matumani naammagittaalliorsinnaatitaanermik atuissanerluni aamma naliliisinnaanera ilanngullugu eqqarsaatigalugu. [...]” Ombudsmandeqarfimmi nutsigaavoq)

Folketingip Ombudsmandiata paasinninnera qulaani oqaatigineqartutut saq-qummertoq ilalerpara.

6.3. Uanga aalajangiinernik pingasunik taakkuninnga naliliinera

6.3.1. Aalajangiineq 1

6.3.1.1. B1 qatanngutinilu pingasut – kissaatigisamik paarlattuanik – angerlarsimaffimmik avataani inissisimaannassasut allakkatigut aalajangiineq taamani Qaasuitsup Kommuniup B1-imut allakkatigut 25. oktober 2017-imersutigit nassiuppaa.

Taamaalilluni B1 tamakkiisumik taperserpeqanngilaq, taamaattumillu aalajangiineq tunngavilersuummik aamma naammagittaalliornissamullu periarfissaq pillugu ilitsersuummik ilaqartinneqartussaavoq, Isumaginninnermimi Naammagittaalliuuteqartarfimmut naammagittaalliuutigineqarsinnaagami.

Aalajangiineq 25. oktober 2017-imeersoq tunngavilersuummik aamma naammagittaalliornissamut periarfissaq pillugu ilitsersuummik imaqarpoq. Tunngavilersuutilli ilusilerneqarsimanerata oqaaseqaateqarnissannut pissutissaqalersippaanga.

Meeraq angajoqqaatut oqartussaassutsimik tigummiagartumut angerlartinneqassanersoq naliliineq aqutsinermi allaffissornikkut missingiussilluni naliliinermik tunngaveqarpoq, taamaattumillu pingaarnertut isiginiagassat missingiussilluni naliliinermi aalajangiisuutinneqarsimasut tunngavilersuummi oqaatigineqarsimasussaallutik. Tunngavilersuut tamatuma saniatigut tamanna pisariaqarpat suliameq pissusiviusut aalajangiinermut annertuumik pingaarteqartinneqartut pillugit paasissutissat pillugit nassuiaammik naatsumik imaqartussaavoq. Uanga paasinninnera unaavoq aalajangiineq taakkua arlaannaannilluunniit imaqanngitsoq.

Imatut paasivara aalajangiinermi tassani tunngavilersuut suliameq siusinnerusukkut iliuuserineqarsimasut arlallit taamani Qaasuitsup Kommuniusup iliuuserisimasaasa allaaserineqarnerannik imaqarnerusoq. Tunngavilersuulli pissutsit kommunip taamatut sularinninniarluni aalajangerneranik nassataqartut sukumiinerusumik allaaserineqarnerannik imaqarani. Aalajangiineq tamatuma kingornatigut eqikkaalluni inerniliinermik imaattumik imaqarpoq:

“Taamaattumik inissiinermi tunngaviusut peqqutingalugit aamma inissinneqarsimanissi atuutsiinnarneqarallarnissaa aalajangiusimaneqarallarpoq angerlarsimaffimmi pissutsit aamma maannakkut atuuttut tunngavingalugit. Nassuiaanneqareersimanissitut angajoqqaat siunissami meeqqanik angerlartitseqqinnissaminnut suliassatik naammassinnissaasa tungaanut.”

Uanga paasinninnerigallagara unaavoq qulaani oqaasertaliineq B1 angerlarsimaffimmi avataani sooq inissisimaannassanersoq naammattumik ersarissuseqartumik nassuiaataaangitsoq.

Uanga paasinninnera unaavoq tunngavilersuut tamatuma saniatigut B1-ip angerlartinneqarnissamik allakkatigut taamani Qaasuitsup Kommuniusumut

qinnutigisamini tunngavilersuutitut atuutsitaanik isummerfiginninnermik naammattumik imaqaangitsoq.

B1 kommunimut ilaatigut allappoq angerlarsimaffimmi pissutsit pitsanngoriarsimasut angajoqqaanilu imigassartorunnaarsimasut. B1-ip suliamik isigininnera kommunip qanoq isummerfigineraa kommunip aalajangiinerani takuneqarsinnaangilaq. Uanga paasinninnera unaavoq B1-ip angajoqqaani pillugit Qaasuitsup Kommunianut allagai qularnaatsumik imatut pissuseqartut taakku kommunip isummerfigisimasariaqaralarlugit.

Inatsisilerineq pillugu atuakkiani matuma nalinginnaasumik ilimagineqarnera innersuussutigaara, tassalu tunngavilersuut suliami illua'tungiusup atuuttussaataaannik annertuutigit isummerfiginninnermik imaqaartussaasoq. Oqartussaasoq suliami illua'tungiusup atuuttussaataaannik tamanik isummerfiginninnissaminut pisussaaffeqangilaq, oqartussaasulli piumasaqaatit suliamut atuumassuteqartut suliami illua'tungiusup atuuttussaatait soorunalimi isummerfigissagai naatsorsuutiginninneq atuuttoq ilimagineqartoq.

2014-imi ukiumoortumik nalunaarutinni immikkoortoq 4.c.iii aamma suliaq 2018-2 nittartakkanni (www.ombudsmandi.gl-imi) atuarneqarsinnaasut aammattaq innersuussutigaakka. Tunngavilersuisarneq, matumani suliami illua'tungiusup piumasaqaatigisanut atatillugu tunngavilersuisarneq ilanngullugu eqqarsaatigalugu, ilaatigut Niels Fengerip allallu atuakkiaanni "Forvaltningsret"-imi (2018-imeersumi) quppernermi 644-mi aamma Niels Fengerip atuakkiaanni "Forvaltningsloven med kommentarer"-mi (2013-imeersumi) quppernermi 637-mi allaaserineqarsimapput. Kiisalu suliat Folketingip Ombudsmandiata 2005-imi ukiumoortumik nalunaarutaani quppernerna 258 tulliiniilu, pingaartumik quppernermi 280-imi aamma 2007-imi ukiumoortumik nalunaarutaani quppernerna 194-imi tulliiniilu, pingaartumik quppernermi 206-imi tulliiniilu ilanngunneqartut innersuussutigaakka.

6.3.2. Aalajangiineq 2

6.3.2.1. Immikkoortumi 5.2.2-mi oqaatigineqartutut uanga imatut paasivara B5 sapaatit akunnerisa 12-it qaangiunneranni angerlartinneqassasoq aalajangiineq Avannaata Kommuniata B5-ip anaanaanut, M-imut, oqaasiinnartigut 28. november 2018-imi nalunaarutigisimagaa. Avannaata Kommuniata M tamatuma saniatigut 29. juli 2020-mi ilisimatippaa B5-ip angerlartinneqarnera kommunip 9. maj 2019-imi akuerisimagaa.

Uanga paasinninnera unaavoq Avannaata Kommuniata aalajangiineq M-imut allakkatigut nalunaarutigisimasariaqaraluaraa, tunngavilersuutitalimmik naammagittaalliornissamullu periarfissaq pillugu ilitsersuutitalimmik, aalajangiinermi tamatuma kingunitsiannua pisimammat. Isumaqarpungattaq allakkat 29. juli 2020-meersut naammattumik pilertussuseqartumik tunniunneqarsimangitsut.

Qulaanili taamatut allakkaluarlunga oqaatigaara B5-ip angerlartinneqarneranik kommunip 9. maj 2019-imi akuersisimaneranik Avannaata Kommuniata M-imut allagai 29. juli 2020-meersut tunngavilersuummik naammagittaalliornissarlu pillugu ilitsersuummik naammattunik imaqtartut. Taamaattumik allakkat taakkua tamanna pillugu oqaaseqaateqarnissannut pissutissaqalersinngilaannga.

6.3.3. Aalajangiineq 3

6.3.3.1. B2-p, B3-p aamma B4-p angerlartinneqarnissaat pillugu aalajangiineq Avannaata Kommuniata meeqqat angajoqqaavinut allakkatigut 15. november 2019-imi nalunaarutigaa.

Aalajangiineq naammagittaalliornissamut periarfissaq pillugu ilitsersuummik imaqarpoq, meeqqalli sooq angerlartinneqarnissaannut tunngavilersuummik imaqarani.

Imatut paasivara aalajangiineq taanna angerlartitsineq pillugu aalajangiisarnermi najoqqutassiaq angerlartitsinerit pillugit aalajangiinerni atugassatut

suliarineqarsimasoq Avannaata Kommuniata – pingaartumilli illoqarfimmi B-mi ingerlatsiviup – suliani arlalinni atortarsimagaa.

Uanga paasinninnera unaavoq aalajangiineq taanna tunngavilersuummik imaqarsimasariaqaraluartoq. Immikkoortumi 5.2.3-mi oqaatigineqartutut aalajangiineq Avannaata Kommuniata allakkatigut aamma nalunaarutigisimasariaqaraluarpa – naammagittaalliornissamut periarfissaq pillugu ilitsersuummik tunngavilersuummillu imaqartumik – meeqqat ataasiakkaarlugit tamanut.

7. Eqikkaallunga inerniliinera

7.1. Uanga paasinninnera unaavoq taamani Qaasuitsup Kommuniusoq aamma Avannaata Kommunia meeqqat angerlarsimaffimmik avataanut inissinneqarsimasut pillugit sulianik pingasunik taakkuninnga suliarinninnerminni kukkussuteqarsimasut.

Naak meeraq angerlartinneqarnissamik kissaateqaraluartoq aalajangiinerit ilaanni meeqqap 15-inik ukiullip angerlarsimaffimmi avataani akuersisitsilluni inissiisarneq pillugu malittarisassat tunngavigalugit inissinneqarsimanerata aalajangiusimaneqarnera kukkunertut ilungersunartutut isorisarialittullu isigaara. Uanga paasinninnera unaavoq inissiineq taamaallaat akuersisitsinani inissiisarneq pillugu malittarisassat tunngavigalugit aalajangiusimaneqarsinnaasoq.

Uanga paasinninnera aammattaaq unaavoq suliat pingasut taakkua tamarmik suliarineqarnerini nalunaaruteqarneq tunngavilersuinerlu eqqarsaatigalugit kukkussuteqartoqarsimasoq.

Paasitinneqarpunga suliani pingasuni taakkunani meeqqat massakkut angerlartinneqarsimasut. Taamaattumillu uanga paasinninnera unaavoq Avannaata Kommuniata sulianik pingasunik taakkuninnga oqaaseqaammi matumani oqaatigisakka tunngavigalugit suliarinneqqinnissaanut pissutissaqanngitsoq.

7.2. Immikkoortumi 5.2.3-mi aamma 6.3.3-mi oqaatigineqartutut imatut paasivara kukkunerit ataasiakkaat immikkuullarissut pineqanngitsut, kukkunerilli ilaat pilersimasut suliat taakku periaaseq illoqarfimmi B-mi ingerlatsi-viup suliani angerlartitsinernut tunngasuni nalinginnaasumik malittagaa tunngavigalugu suliarineqarsimanerat pissutigerpiarlugu.

Suliap uannut paasissutissiissutigineqarnera tunngavigalugu isumaqarpunga Avannaata Kommuniata manna misissortariaqaraa, tassalu kommunip suleriaasia kommunip sulianik angerlartitsinernut tunngasunik suliarinninnermini makkuninnga pisariaqarneratut annertutigisumik isummerfiginnittarnissaa qulakkeerlugu aaqqissuunneqarsimansoq:

- a) angerlartitsiumalluni qinnutigisap inissiinerup taamaallaat akuersisitsinani inissiisarneq pillugu malittarisassat tunngavigalugit attatiinnarneqarnissaanik isumaqarnersoq,*
- b) angerlartitsisoqarnissaanik aalajangiineq angerlartitsisoqarnissaaniluunniit qinnutigisap itigartinneqarnissaanik aalajangiineq meeqqamut inissinneqarsimasumut aamma meeqqap angajoqqaavinut allakkatigut nalunaarutigineqassanersoq aamma*
- c) angerlartitsisoqarnissaanik aalajangiineq angerlartitsisoqarnissaaniluunniit qinnutigisap itigartinneqarnissaanik aalajangiineq tunngavilersuummik naammagittaalliornissamullu periarfissaq pillugu ilitsersummik imaqassanersoq.*

Avannaata Kommunua qinnuigaara oqaaseqaatiga kommunip qanoq iliornissanut pissutissaqalersitsinersoq uannut ilisimatitsissutigeqqullugu.

ILANNGUSSAQ

Aalajangiineq 1

B1-ip taamani Qaasuitsup Kommuniusumut allakkamini 20. oktober 2017-imeersuni ilaatigut makku oqaatigai:

“Uagut qatanngutigiiusugut [B1 qatanngutaalu pingasut tamarmik angerlarsimaffimmik avataanut inissinneqarsimasut; uanga ilanngussara] massakkut angerlarusukkaluarpuq, meeqqanut allanut kiisa usoruttalerpuq, meeqqat allat angajoqqaaminniissinnaapput qanorluunniit sivistigingaluamik, uangullu ulluni kingullerni angajoqqaatsinniittarpugut killilimmik!

Aamma maanna uangut angajoqqaarsiatsinnut pikkuttaleratta, angajoqqaarsiagut annuttaleramik soorlu qasunarerpasilluta.

Uanga [...] -lu aamma inuusuttunut allanut unnukkut aneersinnaasunut soorlu qivattunut usoruttarpugut, angajoqqaarsiatsinnullu oqaraangatta itigartuaannarluta.

Taamaammat massakkut angerlarusuppugut. Nalunngilarsi inuusuttuaraalluni qanoq aneerusunnartigisoq unnukkut. Massakkut angajoqqaangut eqqissisimaarput, allaat anaananga aalajangersimasumik suliffeqalerluni. Taamanilu septemberip 13-ianili imeramik suli imeqqinngillat, kiisa qaammatit marlungungajalerput allamulli nuukkatta!

Uangut qatanngutigiiusugut angajoqqaangut amingaatigisarpugut, innaqatigisanginnatsigit.

Neriuppugut paasineqassalluta angerlarusuppugut! Aammalu neriuppugut qavunga socialimut apuunneqassasoq una allagara.”

Taamani Qaasuitsup Kommuniusup B1 allakkatigut 25. oktober 2017-imeersutigut akivaa. Kommuni ilaatigut allappoq:

“Matumuuna allakkatigut uppersarnerqarpoq Qaasuitsup Kommunianut allakkatigut saaffiginnissutit ulloq 20.10.2017-imik ullulernerqarsimasoq tigunerqarsimamat ulloq 20.10.2017 isumaginninnermi ingerlatsivimmi.

Allakkatigut saaffiginnissutivit imarivaa: Angerlarsimaffiup avataanut inissinnerqarsimasusi qatanngutingiit sisamaallusi angajoqqaanut angerlartinnerqarnissamik kissaateqarnermik. Meeqqanut allanut angajoqqaaminniittunut usoruttalerassi, aamma piffissaq angajoqqaaniiffigisartangarsi killeqarmat. Angajoqqaarsianullu pikkuttalersimallusi qasorpasillutik annuttalermata. Kiisalu aamma B2-lu inuusuttuarangorlusi inuusuttunut unnukkut aneertunut peqataarusuttaraluarlusi angajoqqaarsianit killeqartinnerqarnerasi pissutingalugu itingartinnerqartarassi. Angajoqqaasi maannakkut eqqissisimasut, anaanarsilu suliffeqalersimalluni. kiisalu aamma 13. september imingassartoramik suli imingassartoqqissimanngitsut. Maannalu inissinnerqarnissinniit piffissaq sivitsormat allamut inissinnerqarnissinniit, angajoqqaasilu amingaatingalugit innaqatigisannginnassigit. Allakkallu tamaanga isumaginnittoqarfimmut anngunneqarnissai kissaatingisimangissi.

Allakkanullu imaattumik akissuteqassuugut:

13. september meeqqat tapersorsorneqarnissaannut Inatsisartut inatsisaat nr. 20, 26. juni 2017-imeersoq § 27, imm. 3 tunngavigalugu angerlarsimaffiup avataanut inissinnerqarassi taassuma kingorna angerlarsimaffimmi atukkasi pillugit misissuineq ingerlanneqarpoq, aamma paasissutissat kingumut misissoqqissaarneqarput siunissami pitsaanerusemik angerlarsimaffimmi atungaqalernissarsi anguniarlungu iliuuseqartoqarniassamat, taassumalu malitsingisaanik iliuusissanut pilersaarusiunneqarlusi aamma meeqqat angajoqqaallu tamassi immikkut peqataaffingisassinnik. Imaappoq inissiinnermi pissutaasut toqqammavingineqartut meeqqat angerlarteqqinnissaannut suliaqarfigineqartarnerat pillugu ulloq 5. oktober oqaloqatingineqarnissinni eqqartorneqarput ilisimatitsissutingineqarlutik. Iliuusissanut pilersaarusiornermi angajoqqaanik peqateqartarnissarsi aqqissuunneqarpoq, aammalu weekend-ertarnissat ilanngunneqarlutik. Kiisalu aamma tassunga ilanngullungu eqqartorneqarpoq ilisimatitsissutingineqarluni sillimaffigineqassasoq angajoqqaarsiat killileeriataassappata Illoqarfimmi A-mi allanik angajoqqaarsiaasinnaasunik soqannginnatta tusarniarneqarneqarputsi qanoq inigissanerissi, tamassilu Illoqarfimmi A-miinnissarsi kissaatingingissi paasilluarsinnaangaluarlusi, taamaakkaluartoq ilisimatinnerqarlusi piffimmi iliuusissat nungukkaangata allatut ajornartumik nunaqarfingisaq qimallungu inissiineq ingerlanneqartariaqartarmat

soorlu ulloq unnuarlu meeqqat angerlarsimaffiit. Taamaattoqarnerali suliniute-garnermik malitseqartinneqartarmat siunissami angerlartitsinissaq anguniarlungu.

Taamaattumik inissiinermi tunngaviusut peqqutingalugit aamma inissinneqarsi-manissi atuutsiinnarneqarallarnissaa aalajangiusimaneqarallarpoq angerlarsimaf-fimmi pissutsit aamma maannakkut atuuttut tunngavingalugit. Nassuiaanneqa-reersimanissit angajoqqaat siunissami meeqqanik angerlartitseqqinnissaminut suliasatik naammassinnissaasa tungaanut.

Aalajangiineq naammaginngikkukku allakkat tiguneriniit sapaatit akunneri sisamat qaangiutsinnagit naammagittaalliornissamut periarfissaqarputit uunga:

Atuisoqarnermut Unammilleqatigiinnermullu Immikkoortortaarfik
Postboks 689
3900 Nuuk

Ilanngunneqarpoq naammagittaalliornissamut ilitsersuut. Arlaannik apeqqutissa-garuit allaffimmi sulisumut saaffiginnissinnaavutit ikiorneqarnissaq eqqarsaatinga-lugu.”

Aalajangiineq 2

Avannaata Kommuniata B5-ip anaanaanut, M-imut, allakkamini 29. juli 2020-meersuni makku oqaatigai:

“B5-ip anaanaminut angerlartinneqarnera ulloq 9. maj 2019”

Aaliangerneq:

B5 Qaasuitsup Kommuniata marts 2016 angajoqqaat akuersitillugit angerlarsi-maffiup avataanut inissinneqarpoq. Pissutigalugu B5 kinguaassiuutitigut nap-pammik gonorrémik nappaateqalersimasoq paasineqarmat.

Suliap ingerlanera:

B5 angerlarsimaffiup avataanut ilaqtariinni paarsaneertuulluni, ulloq 09-05-2019 ilaqtareeqarnermut ataatsimiititaliap angerlartinneqarnissaa akuerivaa.

B5 angerlarsimaffiup avataanut inissineqarneranut pasitsaassineq, tassa kinguaassiuutitigut kanngutsaatsuliorfigineqarsimasinnaanerani unnerluussinermik kinguneqarsimasoq, pissutissaarummat. Aammalu kanngutsaatsuliorfiginnissimasutut pasitsaanneqartoq M-ip inooqatigiunnaarmagu angerlartitsinissamik qinnuteqartoqarpoq.

Aaliangiineq:

Matumuuna paasissutissiissutigissavarput ilaqutareeqarnermut immikkoortortap Avannaata Kommuniata angerlartitsiniaanermut qinnuteqaatersi akueralugu aaliangermat. Ulloq 09-05-2019.

Meeqqat tapersorneqarnissaannut Inatsisartut Inatsisaat nr. 20, 26. juni 2017-imeersoq, kapitali 11, § 40 aamma 41.

Maalaarsinnaatitaaneq:

§ 60. Kommunalbestyrelsip Inatsisartut inatsisaat una malillugu aalajangigai Isumaginninnermi Naammagittaalliuteqartarfimmut naammagittaalliutigineqarsinnaapput isumaginnittoqarfiup aqunneqarnera aqqissuussaanelu pillugit Inatsisartut peqqussutaanni aalajangersakkat malillugit.

Imm. 2. Inatsisartut inatsisaat una malillugu aalajangersakkat naapertorlugit aalajangiinernut meeqqat suliani imminnut tunngasuni, tak. imm. 1, naammagittaalliorsinnaatitaapput.

Imm. 3. Meeqqap naammagittaalliorsinnaatitaanera pillugu maleruagassanik erseqqinnerusunik Naalakkersuisut aalajangersaasinnaapput.

Attavissaq:

Atuisoqarnermik Unammilleqatigiinnermillu Aqutsisoqarfik

Imaneq 29, 1. Sal

3900 Nuuk"

Aalajangiineq 3

Avannaata Kommuniata B2-p, B3-p aamma B4-p angajoqqaavinut X aamma Y-kkunnut allakkamini 15. november 2019-imeersuni ilaatigut makku oqaatigai:

“Meeqqanik B2 Cpr.nr. [...]03[...], B3 pr.nr. [...]05[...], B4 cpr.nr. [...]07[...] angajoqqaatut oqartussaasunut angerlartitsinermut qinnuteqaat pillugu

Matumuuna nalunaarutigineqassaaq Avannaata Kommuniani ilaqutareeqarnermut ataatsimiititaliap immikkut ittumik ulloq 14.11.2019 ataatsimiinnermini, meeqqanik angajoqqaatut oqartussaassuilimmumut angerlartitsinermut qinnuteqaammumut suliaq oqaluserimmagu, aalajangiullugulu akueralugu.

Uku allakkat tigoriarukkit isumaginninnermut ilaqutareeqarnermullu immikkoortortaarfimmumut sullissisornut saaffiginnissaatit, suliaq ingerlaqqinnissaanut paassutissanik taamatullu sullissinerup qanoq ingerlanneqarnissaanut pilersaarusiornermut peqataaqqullutit.

Inatsit toqqammavigineqartoq: Meeqqat tapersorsorneqarnissaannut Inatsisartut inatsisaat nr. 20, 26. juni 2017-imeersoq, § 40.

Maalaaruteqarnissamut ilitsersuut:

Aalajangerneq una maalaaruteqartarfimmumut Siunnersuisoqatigiinnut Ataatsimiititalianullu Aqutsisoqarfik, Isumaginninnermut Maalaaruteqartarfik, Postboks 689, Hans Egedesvej 3, 3900 Nuuk, tlf.: 32 80 33, fax: 32 78 50, mail: maalaarut@nannoq.gl maalaarutigineqarsinnaavoq, aaliangernermit sapaatip akunneri arfinillit qaangiutsinnagit. Allakkamut tapiullugu nassiunneqarpoq maalaaruteqarnissamut immersugassaq.”